

WUNOZYAK

Kaal o Ayelzak Jooi Jøn Wunozyai

1 ¹ Nici zɔɔz o Yesu Kiristo o anyek Jooi nɔɔnɔ ka keyelek niini gabara ogin. Kaal nici iina tiŋeere taman. Itoona zin Yesu toonnyai ci Joowo kiiya keyelezayan kaal nicoko aneet Jøn o keen gabaren onin. ² Keteyeeda ni kaal nicoko dook. Kayeedi zɔɔz o Joowo been zɔɔz o Yesu Kiristo een didi ebaal kacine e. ³ Amayuwi zin eeti ci akeep zɔɔzok nicoko, ma amayuwi buk eeti ci azii zɔɔzok nicoko, ma azooni ziniza juruŋ. Eeci eelit iinya ci tɔny ka kiitazɔ kaala nici.

Itoonek Jøn warage nico ɔl o tuwento kuturyowe ween torgerem

⁴ Aneeta Jøn nɛen ci kayeedekuŋ warage nico o. Kitoonekuŋ igeet ɔl o tuwento kuturyowe ween torgerem eel looce o kazi Asiya. Deteni ki ganɔn izi cunooŋ Joowe baal aavi tɔ kinatamma laadun e, ki inoko o, been katin. Ma amayukuŋ buk igeet toonnyawa ogine een torgerem aavtiz nɔɔnɔ ŋuma lecere onin alaazetu. ⁵ Amayukuŋ buk Yesu Kiristo ween bacoi o iimi. Niini abuu o arak daayiz been ŋaazi o aŋaaneke roget o abil been nɛen. Ma een niini alaan o abal alaata o loocu dook.

Nɔɔnɔ nɛen o areezet ageet, ma otoonyawet oŋe ogaac biyete ogin. ⁶ Ma arɔnyanet ageet kiziti alaata ci adikir kaliŋliŋonek Jook ween baatinai. Abon bai kanaat naaga nɔɔnɔ, ma kadiŋdiŋan nɔkɔ kodot.

⁷ Iziikto di! Aku katin niini diizwani. Kicininit ɔl dook kurum buk ɔl baal akat nɔɔnɔ dilawa e. Ma aluwek katin ɔl ci loocu noko dook nɔɔnɔ. Nici zɔɔz ceen didi. Nɔɔnɔ nɛen.

⁸ Azi Jooi nɛ, “Koontanɛ, ma katiranane.” Azi nɔkɔ Jooi baal aave tɔ baale kinatamma laadun e, ki inoko o, been katin. Niini Jook o anyak doyizok dook.

Acin Jøn Yesu wunozyai

⁹ Aneeta Jøn o keen gotonu unooŋ tuwenta o kazɔl ki igeet piryakzet, ma kazɔl baliin o Yesu Kiristo. Ma karuwek zɔɔ looc tuwenta naaga dook. Kacabje baale ŋaaten viriviro aleya maama kazi Patmos ka kaavu waan ŋinaante giye o kuuwaye zɔɔz o Joowo, ma kaduwane zɔɔz o Yesu een didi. ¹⁰ Ma iitene o yubzento iyyayan Vɔŋjizi o Joowo kiyo wunozya o. Ma kazii molok ci appe ci agerɛny kiyo toromba o azɔɔz aneet bawuca. ¹¹ Anekan nɛ, “Teyɛet kaal ci acin noko waragewa zɛɛ toonek warage nico ɔl o tuwento kuturyowe ween torgerem kazi Evesos ki Simirna ki Pergamum ki Sayatara ki Sardis ki Viladelpia been Ladosiya.”

¹² Mazi kookce ka kicin eet ci azoozekan o, bar kacin tokolen ceen warki een torgerem. ¹³ Ma kacin tokolen nicoko kɔrgena gi ci kizik eet ci deer ci aborcek rum ci wun kal kurum tɔdɔ, ma acabek kavali ceen warki. ¹⁴ Maje imana cigine o vɔɔre per kiyo biyen o gɔɔn atiilna tammu o, maje kebere alanyit kiyo goo o. ¹⁵ Maje zɔɔna kizik zurtenen o gɔɔn apucpucani zɛɛ ma azi pilpil o. Maje mɔɔyɔ cine o kizik molok o maam o gɔɔn ariiya be tadena o. ¹⁶ Maje aziite cin azo o agam monyony ceen torgerem. Maje otoge cin o aduŋna gina ci leet kabanyɔ dook. Maje ŋum cine o alanyit kiyo kɔr o gɔɔn araane ɔɔɔt o.

¹⁷ Mazi kacin nɔɔnɔ nɔkɔ, kiita nɔɔnɔ zɔɔne kir kiliitawan lɔɔci lai kiyo eeti o adaai o. Iiya ni niini, ma aku ataadekan aziit cin azo o, ma anekan nɛ, “Má aŋole looc gaga. Nici aneet o koontanɛ, ma katiranane. ¹⁸ Aneeta nɛen o karogi nɔkɔ been nɛen. Baale rak kadaawa. Inoko zin o koroga nɔkɔ izi nɛen. Kanyei doyiz ci kamɔge daayiz, ma kanyei nyoocec ci ŋin o daayizo. ¹⁹ Inoko zin teyɛet kaal ci acin noko been kaal ci ka kutuguze katin e. ²⁰ Inoko icinu monyony ceen torgerem aziite can azo o been tokolen ceen warki een torgerem o. Keŋti zin ci kaal nicoko nɛen ce. Ma monyonya ceen torgerem o toonnyak o Joowo abek ɔl o tuwento kuturyowe ween torgerem. Maje tokolena ceen torgerem o ɔl o tuwento kuturyowe ween torgerem nɛen.”

Zɔɔz o itoononek ɔl o tuwento kuture o kazi Evesos

2 ¹ Nici zin zɔɔz ci aku ŋaaten aneet o kagam monyony ween torgerem aziite onan azo, ma kawɔ tokolen ween warki kɔrgena. Teyeedek zin zɔɔz co toonnyai o ɔl o tuwento kuture o kazi Evesos. ² Enek nɛ, Kaga kaal ugooc abon gɔɔn agoonu nɔkɔ. Kagayuŋ ŋedet aliŋliŋnyu ɔɔɔt o. Buk kagayuŋ gɔɔn amezu piryakzet zinzeetine ci alal. Kagayuŋ gɔɔn adewanu eleeti ole o ger. Ma buk icintawu ɔl o gɔɔn anyek eleeti kiziti toonnyak vɔlɔŋa, makacin didi ojoktawu niiga vɔlɔŋ uneeŋ. ³ Kagayuŋ buk igeet alalnuŋ zinzeeti ɔɔɔt, ma gɔɔn amezu piryakzet zaare ogan calaŋ arnekaŋ.

⁴ Bar zin anyak gi ci kabornekuŋ ce. Kacinuŋ alajaan areezaŋ kiyo baale e. ⁵ Abaabanit di reezinet baal areezaŋ rak ɔɔwa e. Inoko abacu gɔl. Karooŋnyuŋ zin abaabanit ka eteedɔi gɔl nico. Mā alaŋ agoonu nɔkɔ, kakunakuŋ koca ma kaku kanyeyɛ tokolec unooŋ gɔɔn atukuluŋ o ŋaao onin gɔɔn alanyici o aavtiz nɔkɔ.

⁶ Bar zin ŋaan kareezuŋ naana igeet giye o gɔɔn abornu niiga ɔl o kazi Nikolatan kiyo buk kabur naana o.

⁷ Mā anyaku iin, abon aziiknu kaal ci aduwak Vɔŋjizi o Joowo ɔl o tuwento o juruŋ. Ma ɔl o amez piryakzet zɛɛ ma aŋorneke, kanyi tiŋeere naana nɔɔgɔ kadayit kebere o keet o rogeto abil mana o Joowo kɔrgena.

Zɔɔz o itoononek ɔl o tuwento kuture o kazi Simirna

⁸ Nici zɔɔz o aku ŋaaten aneet o koontanɛ ma katiranane baal kadaai, ma karogi bodo e. Teyeedek zin zɔɔz co toonnyai o ɔl o tuwento kuture o kazi Simirna. ⁹ Enek nɛ, Kaga giden been maatiz unooŋ nɔkɔ. Bar zin tamma eeginu niiga arɔk ɔɔɔt. Kaga buk amezu niiga momoz o gɔɔn adomnyuŋ ɔl o anyek eleeti kiziti Juz, ma bar alaŋ eegin niigi ɔl o Juz didi, bar eegin niigi dook ɔl ci Loryento. ¹⁰ Má aŋolinu zin kaal ci katin avu apirnanuŋ igeet neke been nɛen. Agiduŋ ŋedet tiŋeere Loryen igeet gole ci arike ɔl koogi ŋaatonooŋ ceez o cabiinto. Bar zin anyak giden nici iinya ci miliny ter. Anycek zin zinzeeti cugooc o kiimte ŋaaten aneet mayo nuun adaaŋnu, eeci ŋaan kakɔ kanyuŋ kondene o rogeto.

¹¹ Mā anyaku iin, abon aziiknu kaal ci aduwak Vɔŋjizi o Joowo ɔl o tuwento noko juruŋ. Ma ɔl o amez piryakzet zɛɛ ma aŋorneke alaŋ bodo niigi adaai daayize o vurto.

Zɔɔz o itoononek ɔl o tuwento kuture o kazi Pergamum

¹² Nici zɔɔz o aku ɲaaten aneet o kanyei gina o leet kabanyɔ dook. Teyeedek zin zɔɔz nico toonnyai o ɔl o tuwento kuture o kazi Pergamum. ¹³ Enek ne, Kagayuy nɔkɔ azuunu zaar ogan kɔdɔk kak o. Mayo nuun abaaku niiga ɲaao anyak lecer o Loryento alaazetu o, ɲaan adanjit tuwen o atuyay niiga aneet been neen, mayo nuun een iinyaye baal aruwen bacoiti onane iimi ziniz kazi Antipas e. Aruwe waanice niini kuture unooɲ abaai Loryen. ¹⁴ Bar zin olla anyak kaal ci miliny kabornekuɲ ce. Anyak ɔl oogi ɲaatunooɲ ci agam zɔɔz o eet o kazi Balaam baal ademzek niini eet o kazi Balak ka kalabeke ɔl o Israyil oɲe gole ci anyeke nɔɔɔ kadayit kaal o ataabi ɔl joowane o adilyai, been gole o ka kutuguzi waanzete. ¹⁵ Bodo buk anyak ɲaatunooɲ ɔl ci agam demziin ci ɔl o kazi Nikolatan. ¹⁶ Abon zin ateedinu gɔl nico, gerze ɲaan kayiyakuɲ igeet kataman, ma kaku koor ɔl nicoko ginawe onan aduɲna otoga.

¹⁷ Mā anyaku iin, abon aziɲɲu kaal ci aduwak Vɔɲizi o Joowo ɔl o tuwento o juruɲ. Ma ɔl o amez piryakzet kanyi tiɲeere nɔɔɔ dayiin o kazi mana itanjonek nɔɔɔ tamma. Ma buk kanyi katin eet codoi gɔɔn ɲaatineɲ be ci vɔɔr ci ayedonek zaara ci colai, ma akɔm ɔl ci aga zaar nicoko bar aga ɔl ci anyonek o doon.

Zɔɔz o itoononek ɔl o tuwento kuture o kazi Sayatara

¹⁸ Nici zɔɔz ci aku ɲaaten aneet ɲeerti Joowo o kanyei kebere o alanyit kiyo goo o, ma eel zɔɔna ogane kiyo zurtenena o gɔɔn apucpučen ɔl zee ma azi pilpil o. Teyeedek zin zɔɔz nico toonnyai o ɔl o tuwento kuture o kazi Sayatara. ¹⁹ Enek ne, ɲedet kagayuy nɔkɔ agoonu kaal ci abon o. Kaga reezinet unooɲ ki tuwen unooɲ iimi ki liɲliɲɔn unooɲ been zinzeeti ugooc laliz. Buk kagayuy aliɲliɲnyu gɔɔn ɔɔɔt kujuk liɲliɲɔn unooɲ baal reen e.

²⁰ Anyak zin olla gi ci miliny kabornekuɲ igeet ce. Kabornekuɲ gi calaɲ alamnyu niiga ɲaa o kazi Jazabil gɔɔn anyek ele kizi nyakaɲan ci Joowo o. Ademzek gɔɔn niini gabara ogan kutuguzɔ waanzet. Ma buk alabek niini nɔɔɔ gɔl ci ka kadakti kaal o gɔɔn ataabi ɔl joowane o adilyai. ²¹ ɲaanbaal kanyeke nɔɔnɔ waɲi ci ka keteedɔi waanzet cin agɔɔn o been ter, bar alaɲ arɔɔɲ kotoɲ nɔkɔ been neen. ²² Kanyi zin tiɲeere nɔɔnɔ piryakzet ci ɔɔɲe kuwena nɔkɔ, ma kagidi nɔɔnɔ ɔɔɔt ele. Ma kanyi buk tiɲeere ɔl o gɔɔn agɔɔn waanzet kibeen nɔɔnɔ piryakzet ci appe ɔɔɔt, mā alaɲ ateedine niigi waanzet ci agɔɔn kibeen nɔɔnɔ o. ²³ Buk tiɲeere karui nuyak kadaayitɔ, ka zin kagayan ɔl o tuwento dook aneet kaga naana kaal o abaaban niigi zinzeetine ugeec dook nɔkɔ. Ma ɲaan kacacai katin gɔɔn giten kaal o aganɔ kibeen liɲliɲɔn onin agɔɔn.

²⁴ Kanekuɲ zin igeet o abornu demziin ci ger Loryento ne, Akoma bodo gima ci ka kuduwa ɲaatunooɲ. ²⁵ Olla zin abon azuunu gɔl ci abon noko zee ma kabada katin.

²⁶ Ma eeti ci amez piryakzet, ma amena agɔɔn kaal o karoɔɲ naana nɔkɔ kodot, kanyi katin nɔɔnɔ alaazet ci abali moden.

²⁷ Kanyi katin nɔɔnɔ alaazet ci atobɔ kibeen anyan baaba aneet, ka zin kabal niini moden alaazete nico ɲaati anyayi keet ci alaazetu een zii, ma kanyi dɔyiz ci ka kilibi niini nɔɔɔ kazaante taza kiyo gɔɔn alibe iju o. ²⁸ Ma kanyi buk katin nɔɔnɔ kotobɔ ki coboc o ɲeeretinu.

²⁹ Mā anyaku iin, abon aziɲɲu kaal ci aduwak Vɔɲizi o Joowo ɔl o tuwento o juruɲ.

Zɔɔz o itoononek ɔl o tuwento kuture o kazi Sardis

3 ¹ Nici zɔɔz ci aku ɲaaten aneet o kanyei toonnyak o Joowo een torgerem been monyony ween torgerem. Teyeedek zin zɔɔz co toonnyai o ɔl o tuwento kuture o kazi Sardis. Enek ne, Kagayuy agoonu kaal ci ger o nɔkɔ. Abaabanu niiga kizik anyaku tuwen ci adɔi, bar zin kacinuɲ naana igeet akɔmnuɲ tuwen, ma eelnu kiyo adaaktu o.

² Icinte zin. Utuguz kaal o ɲaan utuguz, maɲaan adaayit zel o. Eeci kacin liɲliɲɔn unooɲ ɲaan kobona juruɲ ɲume o Joowo.

³ Abon azoonu kaal baal ojoktawu, ma agawutu laadun e juruɲ. Eteedɔi kaal o ger agoonu, Mā alaɲ ateedinu, kakunakuɲ koca boyoɲyɔɲ igeet kiyo gɔɔn agoryaiti ween aamnyoi o calaɲ agawanu iiten ci kakune.

⁴ Anyak ɔl ci miliny kuture ci kazi Sardis noko calaɲ agɔɔn kaal ci ger. Korkorya zin tiɲeere naana kibeen nɔɔɔ ɲaati kaborceka rumane ci vɔɔrik per giye o aganɔn niigi ɲaati korkorya ki aneet. ⁵ Ma ɔl o amez piryakzet zee ma amɔk kaal o acina nɔɔɔ, aborcek tiɲeere niigi rumane ci vɔɔr per. Ma alaɲ eeyai zaara ugeec bodo waragewe o rogeto been neen. Kayelza tiɲeere naana nɔɔɔ kagaye ɲume o baaba been ɲume o toonnyak ogin buk. ⁶ Mā anyaku iin, abon aziɲɲu kaal ci aduwak Vɔɲizi o Joowo ɔl ci tuwento noko juruɲ.

Zɔɔz o itoononek ɔl o tuwento kuture o kazi Viladelta

⁷ Nici zɔɔz o aku ɲaaten aneet o kadiɲɲi, ma keen didi. Kanyei naana nyooɲe o Devid ka kɔkɔli araan o baliin o Joowo. Zin mā kɔkɔla naana araan nico, akɔm bodo eet ci anyook. Mā kanyuugi, akɔm bodo eet ci ka kɔkɔl. Teyeedek zin zɔɔz co toonnyai o ɔl o tuwento kuture o kazi Viladelta. ⁸ Enek ne, Kaga kaal ugooc abon agoonu nɔkɔ. Mazin giye nico kokoleyuy igeet araan, ma akɔm bodo eet ci ka konyook, eeci ɲaan anyaku niiga dɔyiz ci miliny. Ma ɲaan azoonu zɔɔz onan, ma ɲaan adanjit zaar ogan been neen. ⁹ Iziiyit zin di zɔɔz ci akati ɔl o Loryento ce. Gɔɔn niigi anyek eleeti kiziti ɔl ci Juz vɔɔɲa. Kanyi zin tiɲeere naana nɔɔɔ kivita kakateyuy igeet kozoɲtin ka kagaac niigi kareezuy naana igeet. ¹⁰ Mazin giye o azoonu niiga zɔɔz onan zinzeetine ci alal, kazuunuɲ buk tiɲeere naana igeet kaale o ger iinyaye ci aliben lɔɔci e, eeci avunak tiɲeere kaal ci gerze ɔl ci loocu noko dook.

¹¹ Izi zin ɲinti ka kiyyai naana aɲɔn. Uzuuti zin niiga bonat cunooɲ o nɔkɔ ka calaɲ arigiz eeti oman kondenen ugooc. ¹² Mā amez eeti piryakzet zee ma amɔk kaal o acina nɔɔnɔ dook, kanyi tiɲeere naana nɔɔnɔ kizi kitiir ci ceez o Jook onan, ma abil niini nɔkɔ been neen. Ma alaɲ bodo niini anyeki ceenze nico. Ma kayeedei tiɲeere naana nɔɔnɔ zaar o Jook onan. Ma kayeedei buk nɔɔnɔ zaar o kutur o Jook onan kazi Jerusalem Colai akunak looc tammu tadena ɲaaten Jook onan. Ma buk tiɲeere kayeedei nɔɔnɔ zaar ogan colai. ¹³ Mā anyaku iin, abon aziɲɲu kaal ci aduwak Vɔɲizi o Joowo ɔl ci tuwento noko juruɲ.

Zɔɔz o itoononek ɔl o tuwento kuture o kazi Ladasiya

¹⁴ Nici zɔɔz o aku ɲaaten aneet o keen didi. Kazooz naana tup kaal ci eel tɔp. Keen naana bacoii ween didi, ma eenyca Jooi kaal dook ɲaaten aneet. Teyeedek zɔɔz co toonnyai o ɔl o tuwento kuture o kazi Ladasiya. ¹⁵ Enek ne, Kaga kaal ugooc agoonu dook nɔkɔ. Kagayuy buk alaɲ niiga alalnu, ma buk bodo alaɲ aburnu. Abon zin waan aɲeranu gɔl codoi golowe nicoko. ¹⁶ Mazi alaɲ aɲeranu gɔl codoi, kaburnuɲ koca, ma koortakuɲ tuu. ¹⁷ Aziyu gɔɔn niiga ne, Eeginu arɔk ci akɔm gi ci amaanu. Bar zin alaɲ niiga

agayu ma eeginu boyok, ma eeginu rubene, ma awoyu ṅaḍinyiny o. ¹⁸ Inoko zin kilotuṅ igeet ivita ataalit warki o aayai odota ka iziti arək. Ivita buk ataalit rumanē o vɔɔr per ṅaatan ka uburucek ubuṅti alyaan cunooṅ noko. Ivita ataalit agerɔ ṅaatan ka ɔkolti keberē coma acinenu.

¹⁹ Kagernyei zin gɔɔn naana ɔl o kareez dook ka kamadek nɔɔgɔ gɔl o abon. Anycek zin niiga zinzeeti ugooc korogit. Okolit keberē ugooc juruṅ ka abadayaṅ niiga aneet. ²⁰ Iziikto di juruṅ! Aneeta neen ci kabil tatoga karui karogi o. Mā anyak eet ci aзиiṅnan molok onan, ma akolekan karogi, kako ceeze onin, ma kako kazolona naana kibeen nɔɔnɔ. ²¹ Ma zin ɔl o gɔɔn amez piryakzet kiyo buk baale naana e, tiṅeere karomena ki aneet been baaba lecere onan alaazetu. ²² Mā anyaku iin, abon aзиiṅnu kaal ci aduwak Vɔṅizi o Joowo ɔl ci tuwento noko juruṅ.

Acin Jɔn tammu taden wunozyai

4 ¹ Ma vurte ci kaal nicoko ivitayan bodo wunozyawa ogen. Kacin tammu keṅ akoli. Ma kazii bodo molok we ele agereny kiyo toromba o, ma anekan ne, “Ija tadena ṅaato ka keyeleyin gi ci ka kiita katin ce.” ² Ecodoi nɔkɔ iyyayan Vɔṅizi o Joowo kiyo wunozya o. Ma kacin tamma ṅinaante lecer ci alaazetu anyak eet ci aave. ³ Ma kacin eet ci aavi ṅinaante o azi ṅum cine o pilpil kiyo kagoranti o agirgir alina o. Ma aliya lecer ci alaazetu noko bɔɔɔye ci anyak golnya ci colai kic kiyo kagoranti o colai gɔɔn alina o. ⁴ Ma bodo buk aliya lecer ci alaazetu noko lecere ogen ceen eetoma ki tiin wec. Ma aavtiye lecere nicoko alaata ceen eetoma ki tiin wec ci aborcek rumanē ci vɔɔr per, ma anyak kondenen ceen warki ootine. ⁵ Ma abadi bɔɔɔyeta lecere ci alaazetu noko, ma ajul. Maje ṅaati lecerɔ noko ṅina anyak tɔlit ceen torgerem ci alanyit. Ma nicigi vɔṅizok o Joowo een torgerem neen. ⁶ Ma ṅinti arek leceri keṅ o anyak gi ci kizik liil ci liilim kiyo gizazac o.

Ma aliya lecer ele kelege ceen wec ci anyak keberē ci meelik keṅtine been bawucin buk. ⁷ Adoma kelegiti ci oowu o bar kizik maa. Maje kelegiti ci anowɔ o bar kizik ariz. Bodo kelegiti ci anowɔ ki gɔɔn nico o abil ṅum cine o kiyo ṅum o eet o deer o. Maje kelegiti ci atiranan o abil kiyo zeeroc ṅaati akuli o. ⁸ Kelege nici dook anyak gɔɔn ceeni ṅaatineṅ taba ceen tɔrkɔnɔm. Ma anyak tabana cigeece o keberē eecitɔ been eci bitaalu buk. Ma aben kelege nicigi waazinok been baalinok dook beniin ci azi ne, “Alile. Alile. Alile Manyi Jooi o anyak dɔyiz dook. Niini aavitɔ baale kinatamma e laadun, been inoko o, been buk katin.”

⁹ Gɔɔn kelege nicigi adiṅṅiṅan eet ci aavi lecerɔ noko, ma atitiny niigi nɔɔnɔ, ma anyek nɔɔnɔ zany beniinowe. Eeti nici arogi niini nɔkɔ been neen. ¹⁰ Mazi agɔɔn niigi nɔkɔ, iṅaaz alaata ween eetom ki tiin wec e lecerene ugeec, ma akani kozoṅti looc eet ci aavi lecere ci alaazetu o ṅuma, ma adiṅṅiṅan niigi nɔɔnɔ o arogi nɔkɔ been neen. Ma arek niigi kondenen ugeec e ṅino arek leceri o alaazetu keṅ, ma ano ne, ¹¹ “Een niina Manyi, ma een Jook neen. Aganonu niina ki diṅṅiṅon been titinyon kibeen dɔyiz. Ineeta neen baal eenyca kaal dook, ma anyi nɔɔgɔ dook roget ci arogni oowe unun doon.”

Titinyon o Nyɔɔn o Joowo

5 ¹ Ma kacin eet ci aavi lecere ci alaazetu noko anyak warage aziite ci azo o. Ayeedi warage nico kabanyɔ dook, ma atuuzi. Ma arome ɔtɔgi mutulai lak torgerem ka kɔkɔm eet ci akɔl. ² Ma kacin toonnyai ci Joowo ci anyak dɔyiz ɔɔɔt. Agereny molowe ci appe azi ne, “ṅeneen ci agano ṅaati aarane mutul ceen torgerem noko ka kɔkɔl warage ci atuuzi keṅ noko?”

³ Bar akom eet ci ajoyai tammu tadena, karabɔṅ een loota, karabɔṅ een tɔɔ loota ci ka kagantɔ ṅaati akoli warage ci atuuzi noko ka kicin keṅ eecitɔ. ⁴ Kutulu ni ɔɔɔt ele, eeci akom eet ci agano ṅaati akoli warage nico ka kekeep zoook ci ayeedi eecitɔ o. ⁵ Mazi ṅaan kalu nɔkɔ, eneyan alaani codoi alaate ci ona aliya lecer ci alaazetu o ne, “Má alu. Cin di eet ci akanonek zaara ci kazi Maa o Bor o Juda noko. Niini dole ci dɔl o Devid. Amək niini kaal dook. Agano niini kaara mutul ceen torgerem noko, ma akɔl warage nico.”

⁶ Enico ele kicina Nyɔɔn ci abil lecer ci alaazetu noko ṅuma, ma aliya nɔɔnɔ kelege ween wec e kibeen alaata ween eetom ki tiin wec e. Ma Nyɔɔn nici abil kiyo nyɔɔn baal rak ɔtɔɔṅe e. Anyak niini oto torgerem kibeen keberē torgerem. Ma keberē nici toonnyak ween torgerem itoononek looc dook neen. ⁷ Iiya ni Nyɔɔn nici, ma adoma warage ona atuuzi anyak eeti o aavi lecere o alaazetu aziite onin azo e. ⁸ Mazi agɔɔn nɔkɔ, akani kelege ween wec e kibeen alaata ween eetoma ki tiin wec e kozoṅti looc Nyɔɔn ṅuma, ma adiṅṅiṅan nɔɔnɔ. Anyak niigi dook kidoret kibeen kodooce ceen warki ci abiz karkareta tɔc. Ma karkareta nici akati ṅaryiin o ɔl o Joowo. ⁹ Ebenit ni niigi dook beniin ci colai azi ne, “Aganonu niina ṅaati adomane warage ci atuuzi noko ka pila mutul. Eeci baale uruktin ɔl ineet daak. Zin daayize unun ataalayu niina boryok o loocok dook Jook kurum viten ci akani tammu zɔɔ looc e. ¹⁰ Ma anyeyu niina nɔɔgɔ kiziti alaata ci adikir alinṅiṅonek Jook, ma abal tiṅeere niigi ɔl loocok dook.”

¹¹ Mazi kaara keberē bodo, kacin toonnyak ci Joowo ceen eet keet calaṅ kakeep. Aliya niigi kibeen kelek ween wec e been alaata ween eetoma ki tiin wec e lecer o alaazetu. ¹² Ma abene niigi dook molowe ci appe azi ne, “Agano Nyɔɔn ci baal aruwe kadaak noko ṅaati anyayi dɔyiz, ki arɔkzet, ki genyiz, ki alaazet, ki titinyon, ki diṅṅiṅon, been naatinet.”

¹³ Ma kazii molok ci kaal o arogi dook tammu tadena, ki loota, ki tɔɔ loota, been liilowe. Abene niigi dook azi ne, “Kanaatit eet ci aavi lecere ci alaazetu noko been Nyɔɔn. Agano niigi ki titinyon, ki zany, been alaazet nɔkɔ been neen.” ¹⁴ Ma abedeke kelege ceen wec o nɔɔgɔ azi ne, “Didi zin.” Ma akani buk alaata ceen eetoma ki tiin wec o kozoṅti looc, ma adiṅṅiṅan eet ci aavi lecere ci alaazetu o been Nyɔɔn.

Ipilyai mutula o arom warage

6 ¹ Enico kicina Nyɔɔn ṅaati apilan mutulac o oowu mutulaye ween torgerem e. Mazi apila niini mutulac nico, kazii kelegit codoi kelegiene ween wec e agereny molowe ci appe kiyo ajul tammu o azi ne, “Ija.” ² Mazi kaara keberē, kacin jɔm ci vɔɔr aku. Anyak eeti ci atɔɔt o irii, ma anyak kondec o mogiinto ɔɔwa. Awo niini jome nico ka kook kɔmɔk moden o ɔɔɔ ki nɔɔnɔ dook.

³ Mazi bodo apila Nyɔɔn mutulac oma, kazii kelegit codoi azi ne, “Ija.” ⁴ Ma aduṅna bodo jɔmi ci meeri. Maje eet ci atɔɔt o anyonek nɔɔnɔ gina ci wun ki dɔyiz ci aarane ganon loota, ma anyaae looc ɔɔɔn ci akanon ɔl kadaayito.

⁵ Bodo apila Nyɔɔn mutulac oma, ma kazii kelege oke codoi azi ne, “Ija.” Mazi kaara keberē, kacin jɔm ci oli aku. Atɔɔt eeti ci anyak gi o gɔɔn ayabzi ɔl kaal o aziita. ⁶ Ma kazii molok ci kizik bar aku kelege ween wec e. Azi mɔloyi nici ne, “Guruca ci alinṅiṅa eeti iitene codoi agano kibeen labi ci ataalak ele onin doon ka kadak iitene nico ele, bar alaṅ alɛnɔ ki ɔl ci kɔɔk onin dook. Anyak buk dayiin oogi tɔ, bar adoṅnyi ɔɔɔt ele, ma alaṅ anim eeti kataala.”

⁷ Bodo apila Nyɔɔn mutulac oma, ma kazii kelege ween wec e codoi azi ne, “Ija.” ⁸ Mazi kaara keberē, kacin bodo jɔm ci colai aku. Kazi zaar ci eet ci atɔɔt jɔm nico o ne Daayiz. Maje miniṅa ci meelik ger ano nɔɔnɔ vurta. Anyonek nɔɔgɔ dɔyizi ci alibi looc

kaluden codoi ŋaao aŋerin lɔɔci kizi kaludane wec. Aruk niigi ɔl kadaayito ɔrɔnta, ki magize ween tarjo, ki moorizowe, been kelegene ci mootik.

⁹Bodo apila Nyɔɔn mutulac oma, ma kacin ŋaao taabinto loota vojizok ci ɔl baal aruwe giye o azooni zɔɔz o Joowo, ma aborane niigi tuwen uneɛŋ e. ¹⁰Agereny niigi molowe ci appe anɔ ne, “Manyi Jook o anyei dɔyiz, ineet neen o adiŋɔŋ, ma een didi. Ka zin yo rewo been inin ŋaati ka cacoi ole baal aruket ageeta kadaakta e?” ¹¹Anycozek ni nɔɔɔ dook rumanɛ ci vɔɔr wuntik. Ma aduyak nɔɔɔ gi ci ka rak kereyɔi ŋintimiliny, eeci ŋaan anyak gɔnɔgi ci ano Jook ka buk kurukte kadaayito, kiyo baale niigi e.

¹²Bodo apila Nyɔɔn mutulac oma. Taman nɔko ɔtɔɔmɔ lɔɔci kirakirak, ma ookci ii kizi koli ter. Maje nyelɔyi ookci kizi meerik tet kiyo biyeta o. ¹³Ma iinak monyonya looc kiyo arurai kebere o moneeco ŋaati ivaani ŋɔɔti o. ¹⁴Ma atuuzi tammu taden kiyo kuweni o, makacin izi dim. Maje biyen dook kibeɛn viten ween viriviro aliya maama apiyai vitenane ugeec. ¹⁵Maje alaata o loocok dook, ki ɔl o titiny, been alaata o takirnyawu, ki ɔl ween arɔk, ki ɔl ween olenya, ki ɔl ween gabara, kibeɛn ɔl o alinŋinonek niigi aroodi niigi dook bɔɔtwani been vitenane o lukudik eel biyene. ¹⁶Ma anɔ ne, “Bar maya iinakɛt biyen nici ka kiliita bornet nɔŋ ci eet o aavi lecere o alaazetu kibeɛn bornet nɔŋ o Nyoonu. ¹⁷Eeci iiya iiteni uneɛŋ aborni nɔŋ. Ŋeneɛn zin ci ka keela ele iitene nico?”

Aronek bayen ɔl o Israyil een 144,000

7¹Enico kicina toonnyak ci Joowo een wec aŋeronek looc kaludane dook wecjentiya. Ma alam niigi ŋootok ween wec dook jaŋ calaŋ ivaan looc, karabɔŋ een liilok, kati een keɛn. ²Ma kacin bodo toonnyai oma ci aku libire ci jenu o anyak niini katim o Jook o arogi aziita. Ma awo toonnyaiti nici molowe ci appe toonnyak ween wec ona anyonek nɔɔɔ dɔyizi ci ka kilibti looc been liilok e. ³Anek niini nɔɔɔ ne, “Má rak di uulalu looc ki liilok been keɛn zɛɛ ma karike gabara o Jook ona ŋumti bayen.” ⁴Kiziiwa ni ɔl o Israyil aronek bayen ŋumti een dook 144,000. ɔl nicigi avu boryowe o ɔl o Israyil dook. ⁵ɔl ci aŋeryai bore o Juda een 12,000. ɔl ci aŋeryai bore o Roben een 12,000. ɔl ci aŋeryai bore o Gad een 12,000. ⁶ɔl ci aŋeryai bore o Acar een 12,000. ɔl ci aŋeryai bore o Navtali een 12,000. ɔl ci aŋeryai bore o Manasa een 12,000. ⁷ɔl ci aŋeryai bore o Simiyan een 12,000. ɔl ci aŋeryai bore o Livai een 12,000. ɔl ci aŋeryai bore o Isikar een 12,000. ⁸ɔl ci aŋeryai bore o Zebulon een 12,000. ɔl ci aŋeryai bore o Josev een 12,000. ɔl ci aŋeryai bore o Benjimen een 12,000.

Acin Jɔn kɔle ci appe wunozyai

⁹Ma vurte nice kaara kebere, ma kacin kɔle ci meel ɔrɔɔt ele ci akɔm eet ci anim kekeɛp. ɔl nicigi avu boryowe dook, been modene dook, been loocowe dook. Ma avu eel niigi ŋaao lecer o alaazetu been Nyɔɔn. Aborcek niigi dook rumanɛ ci vɔɔr wuntik, ma anyak azeene oto ki keɛn ween keteleen. ¹⁰Ma agereny niigi ɔrɔɔt azi ne, “Aku eelyan Joowe onai aavi lecere o alaazetu kibeɛn Nyɔɔna.” ¹¹Maje toonnyawa o Joowo dook eel niigi ŋinaante aliya lecer ci alaazetu noko, ki alaata ween eetom ki tiin wec e, ki kelek ween wec e. Ma akani niigi dook kozoŋti looc adiŋɔŋan Jook. ¹²Anɔ ne, “Didi zin. Jook ona neen o anyak naatinet, ki titinyɔn, ki genyiz, ki talniin, ki diŋɔŋɔn, ki dɔyiz, been alaazet nɔko been neen. Nɔɔnɔ neen.”

¹³Ijinan ni eeti codoi alaate gi ci anekan ne, “Aga inoko ɔl ci aborcek rumanɛ ci vɔɔr noko? Aga inoko ŋinti avuni niigi o?”

¹⁴Ma kabedeke naana nɔɔnɔ kaneɛ ne, “Manyi, alaŋ kaga, bar aga inoko niina.”

Ma anekan ne, “Nicigi ɔl o adoi tuwen uneɛŋ pɔryakzete baal gɔɔn agiden e neen. Otoonyɛ zin niigi biyete o Nyoonu kiziti rumanɛ ugeec vɔɔre per. ¹⁵Gi zin ci eelni niigi ŋaati lecer ci Joowo o neen ka kilinŋinɔzek niigi nɔɔnɔ tup waazinok ki baalinok ceeze onin. Jook zin ci aavi lecere ci alaazetu noko neen o ka kozootti nɔɔɔ. ¹⁶Alaŋ zin bodo adak nɔɔɔ magizeeti, karabɔŋ aruk kɔr, ma akɔm buk bodo kɔr ci abur avac nɔɔɔ, karabɔŋ een ŋɔɔt ci abur ivaan nɔɔɔ. ¹⁷Eeci Nyɔɔn ci aavi lecer ci alaazetu ŋuma noko oowa niini nɔɔɔ, ma ŋaan akɔyi niini nɔɔɔ valacece o maam o rogeto. Ma eeya tiŋeere Jooi nɔɔɔ tilalɔ ugeec.”

Apila Yesu mutulac o atiranan

8¹Ma vurta mazi apila nyɔɔn mutulac o ano gɔnɔgi ween tɔrkɔnɔm e, itivane tammu taden tiv ŋinti rak ŋedet wun kurum ziit kɔrgen. ²Ma kacin toonnyak o Joowo een torgerem o gɔɔn eel ŋume onin. Anyonek nɔɔɔ dook torombeta.

³Ma aku toonnyaiti oman, ma aku abil ŋaao o taabinto. Anyak niini iju ci eenycai warkine ci aburutni karkari. Ma anyononek nɔɔnɔ karkareta ci meelik ci ayelza ŋaryiin o anyek ɔl o tuwento Jook. Agɔɔn niini kaal nicoko ŋaao taabinto lecer o alaazetu ŋuma. ⁴Arek zin toonnyaiti karkaret goo o, ka kook bureti been ŋaryiin o anaati ɔl o tuwento Jook tammu tadena ŋaao aave Jooi. ⁵Odoma ni toonnyaiti nici goo ŋaao taabinto, ma arek iju o eenycai warkine e, ma ajukek looc. Enico abadun tammu, ma ajul bɔrye ɔrɔɔt kɔtɔɔmɔ lɔɔci diŋakdirak.

Torombet

⁶Maje toonnyawa ween torgerem ona anyononek torombeta e olla areyi ka kotobeec.

⁷Mazi abo toonnyaiti ci oowu o toromba onin, aromnyai maama ceen biyen ki goo been biye, ma iinak niigi dook looc. Ma atoozi lɔɔci ki keɛn ki arte kaludente codoi dim ŋaao aŋerin kizi kaludane iiyu.

⁸Mazi bodo abo toonnyaiti ci ano gɔɔn nice o toromba onin, kacin gi ci kizik be ci appe alanyit kiyo goo o. Ma ajukonek maam o liilu kutuye maama kaludente codoi ŋaao aŋerin kizi kaludane iiyu keelit kiyo biyeta o. ⁹Ma adaai buk leleni codoi lelenete ween iiyu kaale o abaak liile nico. Ma uulali buk kavoolet o liilu leleni codoi lelenete ween iiyu.

¹⁰Mazi abo bodo toonnyaiti oman toromba onin, iina monyatot ci appe tamma ci alanyit kiyo tɔl o gooyo o. Iinak monyatot nici liilok been valace kaluden codoi. ¹¹Kazi zaar ci monyatot nico ne Akaka. Ma ookci maama ci iinak niini noko kakakaac kak. Ma adaai ɔl ci meel ole ci awot maam nicoko o.

¹²Otobo ni bodo toonnyaiti oman toromba onin. Mazi abo, otoozyai ii libir codoi kizi koli. Buk nyelok libir codoi atoozyai kizi koli. Maje monyony leleni codoi atoozyai buk kiziti kolite ter. Ma muur lɔɔci ziik wec waazinok ki baalinok dook.

¹³Mazi kaara kebere, kacin zuut ci adikir amalil tammu tadena reena many, ma agereny molowe ci appe azi ne, “Izi nɔŋa wole, izi nɔŋa wole. Akunak tedec nɔŋa ci targany ɔl o abaak loota ŋaati tedec abe toonnyawa ceen neke iiyu torombet.”

9¹Otobo ni bodo toonnyaiti oman toromba onin. Ma kacin monyatot ona iinak looc e. Anyonek muvtawi ci ka kɔkɔli look ci wun kal. ²Mazi akɔl look otok, aduŋna bureti ci appe ci abil kiyo bureti o gɔɔn atoozene zare o appe ɔrɔɔt o. Ma abuŋa bureti nici ii dook gilinyik kizi koli lɔɔci ter. ³Ma aduŋnak giroc looc burete nico. Ma anyonek nɔɔɔ dɔyizi ci avaci ɔl kiyo kiteena o.

⁴Ma aricanonek nōwō zōwz calañ adayi arte ki keen been kaal o aduḡna tōdōwai dook. Bar olla aduyak nōwō zōwz ci ka kavaci niigi ol o alañ anyak bayen o Joowo ḡumtene ugeec. ⁵Ma anyonek buk nōwō zōwz calañ avaci ol kadaayito, bar olla abon anyek niigi nōwō eleeeti wucez nōkō nyelōwe tur. Maje ciritontō cineeḡ o bar kizik ciritōn o ḡōn kiteenu o ele. ⁶Ma nyelōwene ceen tur noko abalac ol ḡōtōt ele, ma arōḡ niigi daayiz ka coma aliita balcōn nico, bar alañ adaai.

⁷Maje giroc nici eel kiyo ḡōmane o eelnek ḡōḡn o. Anyak niigi ootine kaal ci kizik kavuret ceen warki, ma eel ḡumti kiyo o ol o deer o. ⁸Ma wunte imana kiyo o ḡaanu o, ma eel nyigita kiyo o maatu o. ⁹Ma anyak kubulet ceen ziik. Maje tabana cigeece o anyak molok ci appe kiyo zōwci o kelek o aluti o. ¹⁰Ma anyak kaal ci avaci ol kiyo kiteena o, ma apirname ol nyelōwe tur. ¹¹Ma anyak niigi alaan ceen toonnyai ci Loryento ci abal look ci wun noko. Akanek ol o kazi Ibiro toonnyai nico zaar ci kazi Abadon. Maje ol o kazi Garik awo zaar ci kazi Apalan. Ma keḡ ci zaar nicoko kazi ne liben.

¹²Nici zin nōḡ o targany oowu neen, bar zin ḡaan eel nōḡa ci targany een ram ka kivita.

¹³Otobo ni bodo toonnyaiti oman toromba onin. Mazi abo, kazii molok ci aku ḡaao taabinto een warki abil Jook ḡuma. ¹⁴Anek mōḡyi nici toonnyai nico ne, “Ḍōga toonnyak ween wec baal acabje liile o adikir kazi Yuparatiz e.” ¹⁵Maje laadun toonnyawa ceen wec noko acabje niigi ḡinaante o are iiten nico ka kōt kuruyit niigi ol lelen codoi lelenete ween iyyu kadaayito. ¹⁶Ayit niigi takirnya ci meel ger ci atōt ḡōmane. Ma aduyakan meelitin ci akeebine takirnya nici kiziti 200,000,000.

¹⁷Ma kacin wunozinte can noko ḡōmane nicoko been ol ci atōt nōwō noko. Anyak ol nicigi ogen kubulet ceen ziik meerik kiyo goo o, ma anyak ogen kubulet ci colayik kiyo jaloc o, ma bodo buk ogen anyak kubulet ci maanik kiyo toloyaci o. Maje ooti ci ḡōmanewu o kizik ooti ci maatu. Ma aduḡna utugetine cigeece o goo ki buret been ḡōliz ci ger ḡōtōt. ¹⁸Ma goo ki buret been ḡōliz ci ger aduḡna utugetine cigeece noko aruk ol lelen codoi lelenete ween iyyu kadaayito. ¹⁹Ma dōyizi ci ḡōmane nicoko o abil utugetine been nyalaadete buk. Eeci nyalaadeta cigeece o eel kiyo kowanya o, ma anyak utugeti ci adayi ol kipirta ḡōtōt ele.

²⁰Maje ol o ḡaan kurukte ḡōmanene nicoko kadaayito e, alañ arōḡ kotoḡit baciinok ugeec, bar amena adiḡḡiḡan vojizok o Loryento been joowane o adilyai nōkō. Ma joowane ci adilyai noko eenycai warkine ki zurtenene ci gidāḡ, ki zurtenene ci maan, ki biyene, been keeni. Alañ een joowane ceen didi ka kidiḡḡiḡanit ol, eeci alañ acine, ma alañ aziḡḡe, ma alañ amōt. ²¹Buk ol nici alañ arōḡ kotoḡit monyenet, ki tamarzet, ki waḡḡzet, been gorziin.

Toonnyai ci anyaa warage ci miliny

10¹Kicina ni bodo toonnyai ci adoi aku tamma. Aborconek nōwō diizwana kiyo rumane o, ma atakuconek bōḡye ḡō cin o. Ma abil ḡum cine o kiyo ii o, ma alanyit zōwna cigine o kiyo goo o. ²Anyak niini aziita warage ci miliny, ma akoli warage nici ḡaati anyayi aziita o. Ma arek zooc ci azo o liil, maje zooc ci kaḡeto o arek dōwōn. ³Ma agereny molowe ci appe kiyo aruur maa o. Ma abedeke bōḡyeta ceen torgerem nōwō zōwz julya. ⁴Mazi azōwz bōḡyeta nici julya, kōḡḡa keteyeet zōwz cineeḡ o. Bar kazii molok ci aku tamma, anekan ne, “Ḥōt kaal ci aduwa bōḡyeta nici o. Zooti niina doon. Má ayeedi.”

⁵Ma kacin toonnyai nico adōḡek aziit cin azo o tammu taden. ⁶Ma itoon zaar o Jook o arogi noko been neen o eenyca tammu taden ki kaal o eel ḡinaante dook, ki looc ki kaal o eel loota dook, ki liilok been kaal o anyak dook. Azi niini ne, “Alañaan bodo rewinet o Joowo akō ḡinti reen ḡaati ka kidicai niini liḡliḡon onin. ⁷Inoko zin ma abo toonnyaiti o ano ḡōḡgi ween tōrkōḡm e toromba onin, agaac idica Jooi liḡliḡon onin alañ agayi baal aduwak niini nyakaḡanet ogin doon e.”

⁸Ma kazii molok ona azoozekan tamma e bodo anekan ne, “Bitō doma warage o miliny akoli e toonnyaiti ona anyak e.”

⁹Koowa ni toonnyaiti nico, ma kakō kajin ka kanyan warage. Eneyan ni niini ne, “Doma dak. Aketket tedec otoge cun o kiyo leteci o, bar zin tedec awuci keḡ ḡōtōt.”

¹⁰Kodoma ni warage nico nōwō aziita. Mazi kadei, aketket didi kiyo leteci o. Bar mazi kakuu, ook uwuc keḡ ḡōtōt. ¹¹Uduwayan ni niini zōwz ci anekan ne, “Abon amena uuwaye zōwz o Joowo moden kebere dook kibeen alaata ugeec.”

Uuwayi o ol ween ram

11¹Anyozeyan ni keet ci ka kook kayabizoi, ma aduyakan zōwz ci azi ne, “Tiḡa je. Bitō yabiz ceez o Joowo been ḡino taabinto. Buk keep ol o adiḡḡiḡan Jook ḡinaante. ²Bar zin má ayabiz ceez reerun, eeci anyozozek ḡinitana moden o alañ een Juz. Uulal zin tiḡeere niigi kutur o Joowo nyelōwe ceen eet ram ki tiin ram. ³ḡaan zin kakō naana kitoona bacok ogan een ram ka kivita kuuwayit niigi nyelōwene nicoko ḡaati anyai rumane ci zōrōr.”

⁴Ma bacowa ceen ram noko atobo niigi kibeen keen ween kiḡiro een ram been tokolen ween ram eel ḡume o Jook o abal looc dook. ⁵Mā arōḡ eeti kutuguwek nōwō gi ci ger, aduḡnake koca niigi nōwō goo utugetine ugeec, ma aruk kadaak. ⁶Anyak niigi dōyiz ci alami tammu calañ atiil iinyaye ci uuwayi zōwz o Joowo o. Ma buk anyak dōyiz ci ookci maam dook kizi biye. Ma anyak niigi dōyiz ci anyaake looc moorizok ki kaalyan ci ger ci olla arōḡ niigi.

⁷Mazi avo adicai nyelōwe o uuwawi o zōwz o Joowo, aduḡna tiḡeere kelegiti o mooti loowe o wun kal, ma aku ḡōk ki nōwō. Ma amōk niini nōwō, ma aruk nōwō kadaayito. ⁸Ma oogin eleeeti ugeec gole o kutur o adikir baal adodine Manyi uneeḡ keete ween talakec e. Ma kuturi nici agayi gerzitinna kiyo baale Sodom been Masir e. ⁹Avu zin tiḡeere agelem moderna loocok dook nōwō ci adaai oogin ḡōla noko iinya iyyu ki iiten kōḡen, ma alañ anyek ol kōt kadaac nōwō. ¹⁰Ma atalne tiḡeere ol o loocu daayize ci bacok nicoko o. Ma agam tiḡeere niigi caalit, ma anyo kaalyan ci adizkōn talniinta, eeci ḡōn apirname nōwō nyakaḡaneta ceen ram noko. ¹¹Mazi akō adicai iinya ceen iyyu noko kibeen iiten kōḡen, itiḡawi Jooi bodo nōwō daayiza. Ma anyak ol ci ona aḡaamnek nōwō o ḡoliin ḡōtōt ele. ¹²Ma azii bacowa ceen ram noko molok ci appe ci akunak nōwō tamma anek ne, “Ivitak taden ḡaato”. Makacin didi ilikta diizwana nōwō, ma avōyi tammu tadena kicinit ol o amarnin nōwō e nōkō. ¹³Taman nōkō ḡōḡmō lōcōi ḡirakḡirak. Makacin ilibe kutur libir codoi libiroye ween amōtō kuture nico. Ma adaai ol ceen 7,000 ḡaati ona amōḡni tōdōwa noko. Maje ol ci ḡaan anyigzai o, anyayit ḡoliin ḡōtōt, ma adiḡḡiḡan Jook o tammu tadenu.

¹⁴Nici zin nōḡ o targany ano ḡōḡn o oowu neen. Maje nōḡa o targany ano ḡōḡgi ceen ram noko izi buk aḡon.

Toromba o ano ḡōḡgi ween tōrkōḡm

¹⁵Otobo ni toonnyaiti o aḡorneke toromba onin. Ma kazii molokwa ci avu tamma agereny azi ne, “Ibilun dōyizi o ka kabaloḡ lōcōi ḡaaten Jook kibeen Kiristo tō, ka kabalit niigi looc nōkō been neen.” ¹⁶Ma adoma alaata ween eetom ki tiin wec ona aavtiz lecerete ugeec ḡume o Joowo e, akani kōzōḡti looc ḡume onin, ma adiḡḡiḡan nōwō. ¹⁷Ma anō ne, “Kanaatin naaga ineet o anyei dōyizok dook. Ineet neen baal aave tō baale kinatamma laadun e zee been inoko o. Kanaatin naaga ineet giye o anyaye niina

doyizok dook aziite unun, ma inoko abalu looc. ¹⁸Utuburtin zin modena, ma inoko izi waŋi o aborneke niina nɔɔɔɔ nɔɔɔ. Ma buk izi waŋi o ka payi ɔl o adaai. Ma izi waŋi o ka anyeke bonat gabara ugun een nyakaŋanet. Ma buk ŋaan acacai niina ɔl ugun titiny been ɔl ugun celbez kaal o abon agano kibeen diŋdiŋon o adiŋdiŋanin niigi ineet. Buk izi waŋi ci ka eeyai ɔl baal uulal looc e.”

¹⁹Okole ni ceez o Joowo tammu tadena. Ma ayeizai loidoŋi o terkediiinto ceeza eecito. Ma abadi tammu, ma ajul bɔɔyeta. Maje ŋaato bodo amɔɔt looci, ma atilnai maama ceen biyen.

Acin Jɔn ŋaa been kutsal wunozyai

12 ¹Zin eyelizai gi ci appe panypany tammu tadena. Gi nici bar te ŋaa ci aborcek ii, ma ataadek zɔɔ nyelok, ma anyak ɔɔwa kavur ci anyak monyony ceen amɔɔt ram. ²Ŋaa nici anyake, ma izi aɔɔn ka kotoyai, ma aam nɔɔnɔ dole kutulu ɔɔɔɔt ele.

³Eyelizai ni bodo gi ci appe panypany oman tammu tadena. Gi nici bar te kutsal ci meeri appe anyak ooti torgerem, ma anyak kondenen kibeen oto amɔɔt. ⁴Ma agura nyalaade cin o monyony lelen codoi lelenete ween iiyu tamma, ma ajukek looc. Ma aku abil niini ŋaa nico ŋuma. Are dole kotoyai ka kukuu. ⁵Zin didi otowa ŋaa nici logo o ka kabal ɔl dook loota keete onin alaazetu een ziiit. Mazi ako ookcai, kataman nɔko iraannyai dole nici onyowozozek Jook ŋaao lecer onin alaazetu. ⁶Maje ŋaa alya ivir ook balala ŋaabaal agɔɔnak Jooi nɔɔnɔ ka kook kabaai nyelowe eet ram ki tiin ram e.

⁷Akatai ni enico ɔɔɔn tammu tadena. Toonnyaiti o Joowo kazi Maikol been toonnyak o arome ki nɔɔnɔ ɔɔt ɔɔɔt ki kutsal been toonnyak ogin. ⁸Ma ɔɔɔ zee makacin ɔmɔge kutali kibeen toonnyak ogin. Mazi ako amogji, ɔkoma bodo nɔɔɔɔ ŋintineen tammu tadena. ⁹Ujukcak ni kutali ci appe noko been toonnyak ogin tɔɔ. Ma kutali nici kutsal o kazi zaar ne Loryen neen. Nɔɔnɔ ele neen ween kowat baal alaba looc dook e.

¹⁰Kiziiwa ni molok ci appe aku tamma azi ne, “Inoko zin iiya elyaan o Joowo, ma eyeliza Jooi doyiz o alaazet onin. Buk eyeliza Kiristo doyiz onin. Loryen baal gɔɔn akolak gotɔnɔga ogaac rooni Joowe onai waazinok been baalinok e ujukcak looc. ¹¹Omogit zin niigi nɔɔnɔ biyete o Nyoonu been zooze ween didi baal uuwak niigi e, eeci agamta baale niigi zɔɔz ci adaanŋi ŋaaten Kiristo labak. ¹²Ataltɔ zin niiga ɔl o abaaku tammu tadena dook giye nico. Bar zin izi nɔɔa wole ŋaatunooŋ ɔl o abaaku tɔɔwai been liilowe, eeci Loryen iyyayuy iheet bornet nɔɔa. Aga niini nɔko izi iinya ogine tonye.”

¹³Mazi ako acin kutali zɔɔz o ujukcace niini looc, akata tooyinet ci atɔɔyi ŋaa ci ona ookcai o. ¹⁴Anyozozek ni ŋaa nico tabana ceen ram eel kiyo o zuut o adikir o, ka kiviri kajaari kutsal nico kukulozeke ŋinbaal agɔɔnak Jooi nɔɔnɔ ka kook kabaai nyelowe eet ram ki tiin ram balala e. ¹⁵Mazi acin kutali ŋaa ivirun ŋaatin nɔko, izicek maam ceen tawan nɔɔnɔ vurma ka kitiriwi maama nici ŋaa kooyi many. ¹⁶Bar zin tɔɔwai izi tiritoi ci ŋaawo. Aŋaaki, ma acorza maam ci ona azicek kutali ŋaa o dook. ¹⁷Otoborek ni kutali ŋaa nico nɔɔ ɔɔɔt ele, ma ako ka kook kɔɔɔt been dɔl ci ŋaa nico oogi. Dɔl ci ŋaa nico neen ɔl o gɔɔn azooni lotinok o Joowo, ma atu zozok o ayeizai Yesu een didi. ¹⁸Ma aku abil kutali nici liiltoga.

Acin Jɔn kelek ceen ram wunozyai

13 ¹Ma kacin kelegit ci mooti aduŋna liila anyak ooti torgerem been oto amɔɔt. Ma anyak oto cigine o dook kondenen. Ma ayeedonek ooti cigin noko dook zaara ci abɔlɔli azi ne, Keen naana Jook. ²Kelegiti nici kizik bar kelan, maje zɔɔna kizik kiciciman, maje ɔɔɔgi kizik maa. Ma anyek kutali kelegit nico doyiz onin ki lecer o alaazetu been alaazet onin adikir. ³Ma ɔɔ codoi ootone cigin noko ateedi, ma kizik ka kadaak, bar te toben ci alal labak. Ma atɔɔt ɔl dook zɔɔz nici biye, ma ano kelegit nico. ⁴Ma adiŋdiŋan niigi dook kutsal, eeci anyewun niini kelegit nico doyiz onin. Ma buk adiŋdiŋan niigi kelegit nico. Azi ne, “Ŋeneen ci atobo ki kelegit nico? Ŋeneen ci anim kooryo ki nɔɔnɔ?”

⁵Ma anyononek kelegit nico gɔl ci ka kɔbɔlɔli kutuguwi ele kizi Jook. Ma anyononek nɔɔnɔ doyizi ci ka kutuguwi nɔko nyelowe eet ram ki tiin ram. ⁶Akata ni niini momoz ci amomozi zaar o Joowo, ki ŋin onin abaai, been ɔl o abaak tamma dook. ⁷Ma anyononek nɔɔnɔ doyizi ci ka kɔɔri ɔl o Joowo, ma amɔk nɔɔɔɔ, Ma anyononek buk nɔɔnɔ doyizi ci abali moden o loocu dook. ⁸Ma ɔl ci abaak loota noko dook adiŋdiŋ nɔɔnɔ. Zin ɔl baal laadun ayɔet Jooi zaar ugeec waragewe o rogeto kinatamma e doon calan niigi adiŋdiŋan nɔɔnɔ. Ma waragewi ci rogeto o warage ci Nyɔɔn baal aruk ɔl nɔɔnɔ kadaak e.

⁹Mã anyaku iin, abon aziŋnu zɔɔz nico juruŋ. ¹⁰Mã anyozek eet gɔl ci ka kagamɔi, tiŋeere agamnyi. Mã anyozek eet daayizi ci ka kadaai dilawa, tiŋeere adaai niini dilawa. Zin ɔl o Joowo abon anyak niigi zinzeeti doyiz tuwente o atuwi Jook.

¹¹Bodo ni kacin kelegit oma ci mooti aduŋna tɔɔwai. Anyak kelegiti nici oto ram ci eel kiyo o mirkic o ŋaan miliny o, ma agereny kiyo kutali o. ¹²Ma anyak doyiz ci abil kiyo kelegiti ona oowu e, ma atirit niini gɔn nice. Ma adanek ɔl ci abaak loota noko dook kidiŋdiŋanit kelegit ci ona anyak oowe codoi toben ci alal noko. ¹³Ma agɔɔn kelegiti nici kaal ci atɔɔt ɔl biye. Anyek niini goo kiitak looc tamma kicinit ɔl dook. ¹⁴Ma alaba ɔl ci loocu noko dook giye o agɔɔni niini kaal ci atɔɔt ɔl biye ka kitirit kelegit o oowu. Ma aduwak kelegiti nici ɔl keteenya riritɔn ci abil kiyo kelegiti ona anyak moroten e. Aduwak niini nɔɔɔɔ kutuguza riritɔn nico ka kidiŋdiŋanti niigi kelegit nico. ¹⁵Anyonek kelegit nico doyizi ci abeke vɔŋiz riritɔn o eenyca ɔl kotobto ki kelegit ona oowu e korok kɔzɔz. Ma anyonek riritɔn nico doyizi ci ka kuruyi ɔl o alan adiŋdiŋan nɔɔnɔ kadaayito. ¹⁶Ma adoma kelegiti nici adanek ɔl dook zɔɔz ci ka kanyakti niigi bayen aziine ci azo o, karabɔɔn een ŋumtine, ɔl o titiny ki ɔl o celbez, ki ɔl ween arɔk been ɔl o amaati, ki ɔl ween mirɔk been ɔl o alan een mirɔk. ¹⁷Akom zin bodo eet ci ka kataalo karabɔɔn ataaline kaal, dooke coma anyak bayen ween zaar o kelegit nico.

¹⁸Abon zin anyaku genyiz. Ma eeti ci ageny ajowa niini keŋ ci bayen ci kelegit nico o, ma bayen nici een 666.

Acin Jɔn Nyɔɔn been ɔl ogin wunozyai

14 ¹Mazi kaara kebere, kacin Nyɔɔn ci abil biye o kazi Ziyon Jerusalema. Arome niini been ɔl baal aŋeryai een 144,000 e. Anyak ɔl nicigi ŋumtine zaar o Nyoonu been zaar o baatin ween Jook. ²Ma kazii molok ci aku tamma ci uurut kiyo maama o ariiya biyen tadena o. Ma buk ajul kiyo bɔɔyɔe o. Ma bodo arɔk kiyo kidoreta o abenin ɔl o. ³Ma avu ɔl ceen 144,000 noko, ma avu eel ŋaao lecer o alaazetu ki ŋume o kelek ween wec been ŋume o ɔl ween alaati. Ma aben niigi beniin ci colai. Ma akom eet ci anim kedemez beniin nico, bar aga niigi doon ŋaao ene 144,000 baal ataalanɔ Nyɔɔn nɔɔɔɔ loota biyete ogin e. ⁴Ma ɔl nicigi dook ɔl o azooni eleeti waanzeta ki zocmaziti. Ma ano niigi Nyɔɔn nɔko ŋaati olla te akoyi niini. Ataalyai niigi loocowe dook, ka kiziti ɔl ci Joowo kibeen Nyɔɔn. ⁵Aleek nɔɔɔɔ vɔlɔn been neen, ma akom niigi kaal ci ger abaca.

Acin Jøn wunozyai toonnyak ci Joowo een iiyu

⁶Enico kicina toonnyai ci Joowo akul tammu keŋa. Anyaa niini zɔɔz o abil been neen o kaviyak o Joowo colai ka kiiya kuduwak moden o loocu dook. ⁷Ma agereny niini molowe ci appe azi ne, “Ɔtɔŋɔlte Jook. Idiŋɔŋanit nɔɔɔ. Eeci iiya iiteni o ka kapayi niini ɔl dook. Idiŋɔŋanit zin nɔɔɔ o ɛenyca tamma taden, ki tɔɔɔ, ki liilok, been valace.”

⁸Ma anowa bodo toonnyai nico gɔn oman ci azi ne, “Uulale, uulale kuturi o adikir kazi Babilan. Kutur zin nico neen o gɔn anyek moden kebere dook kutuguzɔ kaal ci ger ɔɔɔt iinya dook calaŋ bac buk zinzeeti azi caki kiyo abaaki o.”

^{9–10}Ma anowa bodo toonnyak ceen ram noko toonnyaiti oman ci agereny azi ne, “Mā alam eet ci adiŋɔŋan kelegit nico been riritɔn onin, ma agama bayen onin karek ŋum karabɔŋ een aziit, abornek koca tiŋeere Jooi nɔɔɔɔ nɔŋ ɔɔɔt ele, ma ajowa niini piryakzet ci appe ɔɔɔt gooye ween lɔtɔn ŋume o toonnyak o tammo been Nyɔɔna. ¹¹Ma bureti ci tiŋeere aduŋna gooye ci avaat nɔɔɔɔ neke aburut tiŋeere nɔkɔ been neen. Apirna tiŋeere niigi baalinok ki waazinok dook, eeci idiŋɔŋanit niigi kelegit kibeen riritɔn onin, ma anyak niigi bayen o zaar ogin.”

¹²Abon zin ɔl o Joowo adɔi tuwente uneen. Abon azooni niigi lotinok o Joowo, ma abon atu niigi Yesu ɔɔɔt.

¹³Enico kiziiwa molok ci aku tamma azi ne, “Teyɛet zɔɔz co. Abil mayuwenet ole o adaai giye o anowi niigi Jook.”

Ma azi bodo Voŋzi o Joowo ne, “Didi zin. Inoko tiŋeere niigi uyubuzit liŋliŋonte uneen, eeci acacak tiŋeere Jooi nɔɔɔɔ bonat o liŋliŋɔn uneen.”

Acin Jøn teedinet ci kaal o loocu wunozyai

¹⁴Mazi kaara kebere, kacin gi ci kizik eet ci deer ci aave diizoc ci vɔɔr. Anyak niini kavur ceen warki ɔɔwa, ma anyak aziita cercer ci lædi ɔɔɔt. ¹⁵Ma aduŋna toonnyaiti oman ceeze o Joowo, ma awo molowe ci appe eet ci ona aavi diizoca o azi ne, “Doma cercer unun, teɛɔ. Ibiiritɔ kaala o loocu dook.” ¹⁶Odoma ni eeti ci ona anyak cercer aziita noko ɔtɔɔmɔwi cercer tɔɔwai, ma ateɛda kaal o loocu dook.

¹⁷Ma kacin bodo toonnyai oma aduŋna ceeze o Joowo tammu tadena. Anyak niini buk cercer ci lædi ɔɔɔt.

¹⁸Ma kacin toonnyai o gɔn abek goo ŋaao taabinto aduŋna ŋinaante. Ma awo niini toonnyai ci anyak cercer noko molowe ci appe anek ne, “Cin di. Kaal o loocu dook loota ibiiritɔ. Doma zin cercer unun ka teɛɔ.” ¹⁹Ɔtɔɔmɔwi ni toonnyaiti nici cercer onin loota, ma ateɛda kaal o loocu. Ma kaal ci loocu noko ɔl o loocu neen. Aruk toonnyaiti nici nɔɔɔɔ o, eeci abornek Jooi nɔɔɔɔ nɔŋ.

²⁰Ma ariik biyeta ugeec loota kiyo maama o tawano o.

Anyaa toonnyawa ɔl o loocu piryakzet lak torgerem

15 ¹Ma kacin gi ci panypany tammu tadena ci ateedan biye ɔɔɔt ele. Bar te gi nici toonnyak ceen torgerem ci ka kanyaaktak ɔl piryakzet ki giden lak torgerem. Ma giden nici giden o aɔrneke. Nici zin dican o bornet nɔŋ o Joowo neen.

²Ma kacin ŋinti kizik liil ci liilim kiyo gizazac o, ma azi pilpil kiyo goo o. Ma kacin buk ɔl ona abor kelegit ki riritɔn onin kibeen bayen onin een 666 e. Eel niigi ŋaati kizik gizazac noko, anyak kidoret o Joowo azeene. ³Ma adiŋɔŋan niigi Nyɔɔn ŋaati abeni beniin ci atobɔ ki beniin baal aben Mosis azi ne, “Manyi Jook o anyei dɔyiz dook, een niina alaan o moden dook. Kaala ugune gɔn agoon ateet ɔl dook biye. Kaala o agoon dook kaal ci eel tɔp. ⁴Ɔl dook aŋolinin ineet, ma atitiny niigi dook zaar ugun. Ineet doon o titiny. Ma tiŋeere avu modena dook ka kivita kidiŋɔŋantin ineet, eeci ɔl dook icinit liŋliŋonok ugun abon.”

⁵Ma vurma kacin ceez o Joowo tammu tadena ɔkɔle, ma kacin ceez ŋino alile. ⁶Ma aduŋna ceeze nice toonnyawa ween torgerem e. Aborcek niigi dook rumanɛ ci vɔɔr ataranet, ma anyak zinzeetine kubulet ceen warki. ⁷Ma anyek kelegiti codoi kelege ween wec e toonnyak ceen torgerem noko kodooc ceen warki een torgerem ci abiz bornet nɔŋ o Jook o arogi been neen. ⁸Ma adala ceez o Joowo gi ci kizik buret ci aku diŋɔŋante o Joowo been dɔyize onin. Ma akɔm eet ci anim kook ceeze o Joowo eecitɔ zɛe ma akɔ adicai piryakzet ki giden ween lak torgerem ona anyaa toonnyawa e.

Aɔutek toonnyawa bornet nɔŋ o Joowo looc

16 ¹Ma kazii molok ci appe aku ceeze o Joowo anek toonnyak ween torgerem e ne, “Ooti kodooc ceen torgerem noko ka ɔɔt aɔutek bornet nɔŋ o Joowo looc.”

²Ma akɔ aɔutek toonnyaiti ci oowu o bornet nɔŋ o kodooc onin looc. Taman nɔkɔ eyennyai dɔkize ci adakac ɔɔɔt ole baal anyak bayen o kelegto, ma adiŋɔŋan riritɔn onin e.

³Bodo buk aku toonnyaiti oman, ma aɔutek bornet nɔŋ o kodooc onin e liilok o adikir. Taman nɔkɔ utuye maama keelit kiyo biyeta o eet o adaai o, makacin adaayitɔ kaala o arogi liilowe dook.

⁴Bodo aku toonnyaiti oman, ma aɔutek bornet nɔŋ o kodooc onin liilok o miliny been valace kutuye kizi biye. ⁵Ma kazii toonnyai o gɔn abek maam azi ne, “Inoko agoon gi ci abon. Apai niina kaal keelit tɔp. Een niina Jook o alile neen baal abil tɔ kinatamma laadun e zɛe been inoko o. ⁶Baale ɔl o gerze akata biye o ɔl ugun been nyakananet ugun. Inoko zin anyeyu buk niina nɔɔɔɔ biye ka kowodit. Ojokta zin niigi payiin ci agano been gerzitin uneen.”

⁷Ma kazii molok ci aku ŋaao taabinto ele azi ne, “Didi zin. Een niina Manyi Jook o anyei dɔyizok dook. Payiinowa ugune een didi, ma eel tɔp.”

⁸Ma aku bodo aɔutek toonnyaiti oman bornet nɔŋ o kodooc onin e ii, ma anyononek ii dɔyizi ci avaadi ɔl aburiza. ⁹Ma avaat aburizi nici ɔl ɔɔɔt ele, makacin odomit niigi Jook o anyaa nɔɔɔɔ piryakzet nico. Alaŋ aga niigi piryakzet nici agano kibeen gerzitin uneen o, ma alaŋ arɔɔŋ buk niigi kotoŋit baciinok ugeec.

¹⁰Ma bodo aku toonnyaiti oman, ma aɔutek bornet nɔŋ o kodooc onin lecer o kelegto anyayi baliin. Taman nɔkɔ adala muuri baliin o kelegit nico lai, ma adak ɔl nyigit balcanta. ¹¹Mayo nuun adakac dɔkize ugeecik, ma abalac niigi ɔɔɔt o, alaŋ arɔɔŋ kotoŋit baciinok ugeecik ger agɔn been neen, bar adɔm niigi Jook.

¹²Ma bodo aku aɔutek toonnyaiti o ano gɔnɔgi ceen tur o bornet nɔŋ o kodooc onin liil o appe kazi Yuparatiz. Taman nɔkɔ owoɔjai liili nici kɔɔk keŋ kak ka kanyek alaati o avu libire ci jenu e gol. ¹³Ma kacin voŋizok ci ger een iiyu ci kizik bar nyeelwa. Aduŋna niigi otoge o kutalo, ki otoge o kelegit o oowu e, been otoge o kelegit o vurto een nyakanan o voloŋo. ¹⁴Nicigi voŋizok o Loryento anyak dɔyiz ci agɔni kaal o ateet ɔl biye. Ma iŋaaz niigi avɔ awa alaati o loocu dook kivita kulute ŋaatodoi ka kereya iiten o ka kooryɔi niigi ki Jook. Ma iitene nice azaan tiŋeere Jooi nɔɔɔɔ dɔyize onin kizi nɔŋa cigeecek targanye.

¹⁵“Iziikto zin. Kakun iima naana kiyo agoryaiti o. Amayuwi zin eeti ci acine baalin dook, ma azooni rumane ogin kizi ajone ka calañ adun niini ñadinyiny, ma anyaaq ele alyaan kola.”

¹⁶Ma anyaaq vojizowa nicigi alaata o loocu ñintodoi. Ma ñinti aloten alaata nici noko awo ol o kazi Ibiro zaar ci kazi ne Armagedon.

¹⁷Ma bodo aku aduutek toonnyaiti ci ano gonogi ceen torkonm o bornet nonj o kodooc onin ñoot. Ma aduuna moloyi ci appe lecere o alaazetu abil ceeze o Joowo tammu tadena, ma azi ne, “Inoko zin odota.” ¹⁸Enico abadiit boroyeta, ma ajul, ma amoot looci dirakdirak ootot ele mootiz ci ñaabaal eenyane looci ñaan kotoomo noko. Ma mootizi nici appe ootot kujuk mootiz o goon laadun amooni looci o dook. ¹⁹Ma apaki kuturi o adikir kazi Babilan kegere lak iyyu. Ma alibe kuturyowa o loocu dook lai. Alañ areyek Jook kuturi ci adikir kazi Babilan noko, ma itoonek noono payiin onin ger o, eeci abornek niini noono nonj ootot. ²⁰Ma azi vitena o kutulik aliya maama dook been biyen ñim. ²¹Ma atilna tammu taden maam ceen biyen ci appintik adiññi kiyo goluweta o, ma iinak ol kodomit Jook giye o apirnanee niigi biyene ci iinak noogo noko.

Acin Jón waanyai ci agayi wunozyai

17¹Iiyayan ni toonnyaiti codoi toonnyaye ceen torgerem ona anyak kodooc o, ma aku anekan ne, “Ija ka keyeleyin piryakzet o apawonek kutur o kazi Babilan eenycai ñaao aliya liilowa o meelik. Kuturi nici atobo niini ki ñaa ceen waanyai agayi ootot. ²Ma oogin niini kibeena alaan. Ma agoon buk ol o loocu dook kibeena noono waanzet ci abaayine kiliita noogo looci lai.”

³Ooyan ni toonnyaiti nici balala vojize o Joowo. Ma ñinaante kicina ñaa ci aave kelegit meeri ci mooti, ma ayeedonek kelegit nico ele dook zaara ci abololi azi ne, “Keen naana Jook.” Ma anyak kelegiti nici ooti torgerem been oto amoto. ⁴Aje ñaa nici aborcek rum ceen gol jaloc. Ma ayiñyñan ele warkine been kalbene ceen kagora azi pilpil kibeena ziira. Ma anyak buk niini diic ceen warki aziita. Maje diic nico abiz ririnya ci kaal o waanzet onin. ⁵Maje ñum cine o ayeedonek zaara ci anyak keñ ci aroodi ci azi ne, “Babilan o adikir o ademzek ol o loocu dook waanzet kibeena gerzitin.” ⁶Ma kacin ñaa nico abaak noono biyeta o ol o Joowo ki biye o bacok o Yesu baal goon aruk niini e.

Mazi kagelem noono noko, kabarañe ootot ele. ⁷Ma ajinan toonnyaiti anekan ne, “Gitaz ci eene barañ o? Ñaan kaduwakin keñ ci akati ñaa nico o, kibeena keñ ci akati kelegit ci aave niini anyak ooti torgerem been oto amoto noko. ⁸Ma kelegiti ci acin niina noko baale rak arogi labak, makacin bodo iziito. Bar zin inoko izi ñinti ka kudunai niini loowe o wun ka kiiya kook ñaao ka kuulalo lai. Mazin ol o abaak loota baal ñaan laadun zaara ugeec keteyeede waragewe o rogeto kinatamma e, ateedi tiñeere noogo biyeta ñaati acini kelegit nico, eeci baale arogi niini labak, ma inoko o iziito, bar zin katin ñaan ayelzai bodo.

⁹Arcoñ zin zozz nici ziiknen ki genyiz. Keñ zin ci zozz nico neen ce. Ma ooti ceen torgerem o biyen ween torgerem aave ñaa nici neen. Ma buk akati niigi alaata ceen torgerem. ¹⁰Maje alaata ceen tur ñaatiñeñ aaryai kizeecto. Maje codoi ñaan abil to. Bodo oman ñaan bar buk laadun kiiya. Mazi aku katin, aku aavi ñinti miliny ter. ¹¹Maje kelegiti baal rak arogi, makacin bodo iziito e, een katin niini alaan ci akebonek gonogi ween torgerem e kiziti turge. Bar zin tiñeere ako niini ñaati uulalin ñim.

¹²Ma oto ceen amoto acin noko, alaata ci ñaan rak kagamit alaazet. Bar zin katin anyononek noogo kibeena kelegit alaazet loota ziit codoi ñor noko. ¹³Ma anyak niigi dook ñaati eegine amoto noko baabani codoi ñor, ma atirit niigi kelegit ka kodok ootota.

¹⁴Oor zin tiñeere niigi Nyoon o Joowo. Bar zin tiñeere amok Nyoon been ol ogin añeryai atu noono kelegit nico ki ol ogin, eeci Nyoon niini alaan o amok alaata dook, ma dooyizi onine ajuk dooyizok dook.”

¹⁵Ma anekan bodo toonnyaiti ne, “Ma liilowa ci acin aave waanyaiti neke moden o loocok dook neen. ¹⁶Maje oto ceen amoto noko kibeena kelegit ci acin niina noko, amarnin katin niigi waanyai nico. Avoyi katin niigi kaal ogin anyak dook, ma oonnek noono looc kaavu ñadinyiny. Ma adak katin niigi ele onin, ma avaat viten ci anyigjai o lai. ¹⁷Jook zin neen o arom baabani uneen kodowe ka kutuguzo gi o aroonkek niini noogo kutuguzo. Jook neen o anyek noogo kanycek alaazet uneen kelegit ka kutuguze kaala dook eo arcoñi niini.

¹⁸Ma ñaa ci acin noko, kutur o adikir abal alaata o loocu dook neen.”

Acin Jón liben o kutur o kazi Babilan wunozyai

18¹Bodo vurma kicina toonnyai oma ci aku tamma. Toonnyaiti nici anyak alaazet ci adikir, ma alina niini ootot kataraan looc dook linata. ²Ma agereny molowe ci appe azi ne, “Iita! Iita kuturi o appe kazi Babilan! Iibe didi ñim! Okoma ol ci abaak ñinaante kina, bar izi ñinti abaai vojizowa o Loryento. Ma buk abaayi kuduvaana been kibaali o ger dook. ³Eeci goon kuturi nici agura moden dook waanzeta ka kivita kutuguzo niigi ki noono waanzet o abaayine kiliita noogo looci lai. Buk alaata o loocu dook utuguzo waanzet been noono. Ma etenyerit tajera o loocu dook nyeriz ci ajowa gole ci ger.”

⁴Bodo kazii molok oma ci aku tamma azi ne, “Udunta niiga ol ogane kuture nico. Má azolu ki noono baciinok cigin o. Gerze ñaan ajowanu payiin ci ger kiyo niini o. ⁵Agawun Jooi baciinok ogin, eeci baciinowa ogine izi meele zee makacin urumit tammu taden. ⁶Inoko zin utuguzek buk niiga noono kaal ci ger kiyo baale agoonekuñ niini igeet e. Acaca kaal o ger baal agoonekuñ niini igeet e lak ram. Ipirtai niiga noono lak ram kujuk baal apirnanuñ niini igeet e. ⁷Igidit noono katamaat ootot ka kotobto kibeena diññiñon been arokzet onin baal anyak e. Eeci goon abololi niini azi ne, “Keen naana ñaa ceen alaan. Ma akom gi ci ka kiinon kiyo ñaa ci boye o been neen.” ⁸Zin giye o abololi niini, oroma piryakzet zooc ecodoi ñor noko. Ma akunak noono moorizi, ma akat culum, ma adak magiz ootot. Ma avaat goo, eeci Manyi Jooi o anyak dooyiz apayewun noono gerzitin.”

⁹Zin katin alaata o loocu baal agoon kibeena noono waanzet e, alu kiitazo tilalo ñaati acini niigi buret ci atoozene kuturi nica neke. ¹⁰Eel tiñeere niigi reena, eeci arole piryakzet cin o, ma ano ne, “Izi nonja targanye. Izi nonja targanye. Uulale kuturi o appe anyak dooyiz kazi Babilan ñim ziite codoi ñor noko.”

¹¹Buk ol ween tajer aluwek tiñeere noono, eeci okoma ol ci ka kataalit kaal ugeec. ¹²Okoma ol ci ka kataalit warki ugeec, ki zurtenen, ki kalbe ween kagora azi pilpil, ki ziira, ki rumane o alina, ki rumane o meeri, ki rumane o acabi ñaai ooti, ki keen kebere o alañ ajoyai gaga, ki kaal dook o agoonnyai otone o arojwanu ki keeni, ki zurtenene, ki ziyyi, been biyene o appintik alina. ¹³Ma okoma ol ci ka kataalit kaalyan o arojñi dayiin madiz, ki kaal o aburutani ol ceezi ka kotonjolti madiz, ki nyaantane, ki ñoren, ki tilen o voo, ki labi, ki tiin, ki eza, ki jomane, ki kavoolet o agurut jomane, been mirok o ataaline ol. ¹⁴Ma anek tajera noono ne, “Inoko kaala baal goon aroon niina kizi kaal cugun e idicai dook. Buk arokzet unune been linat unun obowe lai, ma alañ bodo ajowa been neen.” ¹⁵Ma ol ceen tajer baal goon ajowa arokzet kuture nico o tiñeere eel niigi reena, eeci arole niigi piryakzet cin neke. Ma aluwek katin niigi noono, ma aboobi ootot ele. ¹⁶Ano tiñeere niigi ne, “Izi nonja targanye! Izi nonja targanye! Iiyak liben

kutur ci appe noko. Baale gɔɔn anyak niini rumane ci alina, ki rumane ceen jalo, been rumane ci meeri. Ma anyak warki, ki kalbe ceen kagora azi pilpil, been ziira. ¹⁷Ma bar inoko idicai arɔkzet onine dook ɗim ziite codoi ʒor nɔko.”

Ma alaata o abal baburet o appintik awo liilowe, ki ɔl o alinjɩɩ baburete nicoko, been ɔl o eeron baburete dook adeyai tiijeere niigi kuture nice reena many. ¹⁸Acin tiijeere niigi buret o atoozene kuturi nica, ma agereny azi ne, “Ŋaan laadun baale kibil kuturi ci appe kiyo nici o.” ¹⁹Ma anyak tiijeere niigi ciiren ootine, ma ɔɔga awac eleetine, ma aboobi azi ne, “Izi nɔŋa targanye! Izi nɔŋa targanye kuture o appe! Kuturi nici kutur baal gɔɔn anyet ageet o kalinjɩɩ baburete kiziti arɔk e neen. Bar zin inoko uulale ɗim ziite codoi ʒor nɔko.”

²⁰Ma azi toonnyaiti ne, “Ataltɔ zin niiga ɔl o abaaku tammu tadena, ki ɔl o Joowo, ki toonnyak, been nyakananet giye o uulalo kuturi nici, eeci apayewun Jooi nɔɔnɔ gerzitin ka kizi gi baal gɔɔn aminanɣnyuɣ niini igeet, ma agoonekuɣ kaal o ger e.”

²¹Ɔdɔŋa ni toonnyaiti ci Joowo adɔi ɔrɔt be ci kizik golu, ma ajukek liil kocoldok, ma azi ne, “Ajukonek iima kuturi ci kazi Babilan appe neke looc kook many kɔkɔm eet ci acin bodo kiyo be nici noko. ²²Ɔkɔma kuture nice molok ci bodo arui ɔl kidoret, ki ɔl ci abo torombet, ki ɔl ci abo tavaaret, been ɔl ci abene. Ma akɔm ɔl ceen arinya ka kilinjɩɩ kuture nice bodo. Ma akɔm eet ci azii molok ci areyin ɔl, karabɔŋ uurtene bodo. ²³Alaŋ bodo alanyit tɔlita kuture nice been neen, ma akɔm bodo talniin ci iɩnkawin ɔl. Apawonek zin Babilan gerzitin o, eeci baale tajera o kutur nice ajuk tajer o loocok dook gerzitina, ma aguv baale kuturi nica moden dook tamarzeta been voloŋe onin. ²⁴Eeci buk ajoyai biyeta o nyakananetu, ki biye o ɔl o Joowo, been biye o ɔl baal aruwe kadaayito loota e dook ŋaatin.”

Azii Jɔn beniin ci anaati ɔl Jook wunozyai

19 ¹Ma vurta kazii walwalɔn ci kizik gernyi ci ɔl ci meel ɔrɔt tammu tadena azi ne, “Kanaatit Jook! Nɔɔnɔ neen o eelawet ageet! Anyak niini titinyɔn been dɔyiz dook! ²Payiinowa ogine een didi, ma eel tɔp. Apayewun zin niini gerzitin waanɣnyai o agayi baal gɔɔn uulal looc waanzeta e. Apayek zin Jooi nɔɔnɔ gerzitin giye baal aruyi niini gabara ogin kadaayito e.”

³Ma bodo agereny niigi azi ne, “Kanaatit Jook, eeci bureti ci atoozene kuturi nici noko uburut nɔko izi neen.” ⁴Odomta ni alaata ween eetom ki tiin wec been kelek ween wec akati kozoŋti looc, ma adiŋɗiŋan Jook o aavi lecere onin alaazetu azi ne, “Nɔɔnɔ neen. Abon kanaat Jook.”

⁵Ma aduŋna lecere ci alaazetu noko mɔlɔyi ci azi ne, “Niiga ɔl o alinjɩɩoneku Jook, atanaaz nɔɔnɔ. Dɔlya o kidic been ɔl o mayan o aŋolinu Jook, abon anaatu niiga nɔɔnɔ.”

⁶Bodo ni kazii molok ci kizik molok ci ɔl ci meel ɔrɔt ci kizik walwalɔnti cineeŋ o maam o gɔɔn ariiya be tadena o. Ma kizik bar bodo juli o gɔɔn ajuli tammu o. Azi mɔlɔyi nici ne, “Atanaaz Jook ween Manyi onai adɔi, ma een alaan o abal kaal dook!

⁷Katalɔ zin naaga! Katanaaz titinyɔn onin, eeci iiya iiteni o ka kitiŋkawɔi Nyɔɔn. Aje nyatarani onine iyinyiŋan buk ele awace ogin. ⁸Ma anyozozek nyataran rum ci vɔɔr alina ka koborocek.” (Ma rum cine vɔɔr aborocek noko ayelza kaal o abon agɔɔn ɔl o Joowo.)

⁹Ma anekan toonnyaiti ci Joowo noko ne, “Teyɛt gi ci azi ne, Amayuwi ɔl o awak ɔl tiŋkawiin ci Nyoonu o.” Ma anekan bodo toonnyaiti nici ne, “Nicigi zoosok o Joowo een didi.”

¹⁰Mazi kazii zɔɔz nico, kakate kozoŋti looc ka kidiŋɗiŋan nɔɔnɔ. Bar anekan niini ne, “Bil. Má agoon nɔko. Keen naana gabaren ci Joowo kiyo buk niina o. Ma keen buk gabaren kiyo gotonogu o gɔɔn atu zɔɔz baal anyaak Yesu nɔɔgo e. Jook zin doon o abon kadiŋɗiŋan naaga nɔɔnɔ, eeci Vɔŋjiz onin neen o anyek ɔl kutuwit Yesu, ma anyek buk nɔɔgo kagaac kaal o ka kiitazo katin.”

Acin Jɔn eet ci atɔt jɔm ci vɔɔr wunozyai

¹¹Enico ɔkɔle tammu taden, ma kacin ŋinaante eet ci atɔt jɔm ci vɔɔr. Ma eet nico kazi zaar ne limi Ziniz, ma kazi oogi ne Een Didi. Apak niini kaal roonnya keelit tɔp, ma ooryi niini oriin ci abon abil tɔp. ¹²Anyak niini kebere ci alanyit kiyo goo o, ma anyak kondenen ci meelik ɔɔwa. Ma ayeedonek nɔɔnɔ zaara ci aga keŋ cin niini doon. ¹³Maje rum cin aborocek o aparaneke biyeta. Ma kazi zaar cigin ne Zɔɔz o Joowo. ¹⁴Ma anowa nɔɔnɔ takirnya ci tammu tadenu. Aborocek takirnya nici rumane ci vɔɔr per, ma atɔt buk niigi jɔmane ci vɔɔrik per. ¹⁵Ma aduŋna otoge cin o gina ci leedi ka kɔmɔgi moden o alaŋ ano nɔɔnɔ. Nɔɔnɔ zin neen o ka kabal nɔɔgo keete onin alaazetu een ziit. Ma apayek nɔɔgo gerzitin bornet noŋe o Jook o adɔi. ¹⁶Ma ayeedonek rum cin aborocek o been azan zaara ci kazi Alaan o Amɔk Alaas Dook, ma buk kazi Manyi o Amɔk Manyigi Dook.

¹⁷Ma kacin bodo toonnyai ci tammu abil iwa. Agereny niini molowe ci appe anek kuduva o amalil tammu tadena dook ne, “Ivita adayit lokiyo ci ɔl ci aruk Jooi kadaayito ce. ¹⁸Ivita adayit ɔl ween alaas, ki alaas o takirnyawu, ki takirnya, ki ɔl o atɔt jɔmane, ki jɔmane, ki ɔl ween mirɔk been ɔl o alaŋ een mirɔk, ki ɔl o titiny been ɔl o celbez.”

¹⁹Kicina ni kelegit o mooti ki alaas o loocu been takirnya ugeec alote niigi dook ŋaatodoi, ka kɔɔrtɔ ki eet o atɔt jɔm o vɔɔr e been takirnya ogin. ²⁰Ma agam ɔl kelegit ci mooti noko been nyakanan o voloŋo baal agɔɔn kaal o atɛt ɔl biye kelegit nico ŋuma e, ma avɔyi cabiin. (Nyakanan zin ci voloŋo noko neen baal alaba ɔl o anyak bayen o kelegto ŋumtene ugeec e. Alaba niini nɔɔgo kaale baal agɔɔn atɛt ɔl biye e, ka kidiŋɗiŋanit niigi riritɔn o kelegit nico.) Ma ajukonek kelegiti kibeen nyakanan o voloŋo rogetet goo ween lɔtɔn abil nɔko been neen. ²¹Maje takirnya ugeec urukte lai ginawe o aduŋna otoge o eet o atɔt jɔm o vɔɔr e. Ma adak kuduvaana nɔɔgo zɛɛ been paŋ.

Acin Jɔn ɔl ci iŋaaz daayiza wunozyai

20 ¹Kicina ni toonnyai ci aku tammu tadena. Anyak aziita muvta ci look o wun been nyaramram ci appe ɔrɔt. ²Ma agam niini kutsal ween kowat o kazi zaar ne Loryen. Ma adɔɔn nɔɔnɔ nyaramrama ka kacabe nɔko irkitok ci eet tur lak amɔtɔ (1000). ³Ma ajukek nɔɔnɔ look o adan, ma anyoogek look eecito kɔdɔk ɔrɔt ele ka calaŋ bodo alaba moden zɛɛ ma akɔ adicai irkitowa nicigi. Ma vurte ci katin adican irkitowa nici e, ɔɔgjai rak bodo niini ŋintimiliny.

⁴Kicina ni ɔl ci avtaz lecerene ci alaazetu, ma anyanonek nɔɔgo alaazet ci ka kapakti ɔl. Ma bodo buk kacin ɔl baal gɔɔn aruwe kadaayito giye o uwayi niigi zɔɔz o Joowo een didi baal ayelza Yesu e. Baale niigi ŋaan kidiŋɗiŋanit kelegit nice been riritɔn onin. Ma ŋaan kagamta bayen onin ka kanyayit ŋumtene ugeec, karabɔŋ een azeene. Itiŋgazo zin niigi daayiza ka kabalit looc niigi kibeen Kiristo kiziti alaas irkitok eet tur lak amɔtɔ (1000). ⁵Nici zin ɔl o iŋaaz daayiza ɔɔwa neen. Maje ɔl o ŋaan kitiŋgazo daayiza ŋaazye ci oowu noko, alaŋ rak niigi iŋaaz zɛɛ ma akɔ adicai irkitowa ceen eet tur lak amɔtɔ (1000). ⁶Zin ɔl ci iŋaaz

daayiza ɔwa o amayuwi niigi ɔɔt, eeci daayizi o vurto alaŋaan bodo anim nɔɔɔ. Bar iziti niigi alaŋ ci adiŋɗan Jook been Kiristo, ma azɔl niigi ki Jook alaaŋet onin irkitok ceen eet tur lak amɔtɔ noko dook (1000).

Amɔk Jooi Loryen

⁷Mazi katin akɔ adicai irkitowa ceen eet tur lak amɔtɔ (1000) neke, ɔɔɗjai Loryen cabiinte onin. ⁸Zin katin ma aduŋna niini, akɔ alaba moden o abaak loocowe dook. Ma ɔl ci akɔ alaba niini neke ano moden o kazi Gok been Magok. Alota katin niini moden niceke dook ŋaatodoi ka kɔɔrtɔ ki ɔl o Joowo. Ma modena nicigi mɛɛle ger kiyo kazac o liiltoɗu o. ⁹Azaanonek katin niigi looc dook, ma aliya ŋino aavtiye ɔl o Joowo been kutur o arɛɛz Jooi. Bar zin katin aku goo tammu tadena, ma avaat nɔɔɔɔ dook lai. ¹⁰Maje Loryen ci baal alaba nɔɔɔɔ o ajukonek niini goo ween lɔtɔn o alaŋ adiiti nɔkɔ been neen. Goo nici goo baal ujukozek kelegiti o gerze been nyakaŋan o voloŋo e neen. Ka zin kipirta niigi ŋinaante baalinok ki waazinok nɔkɔ been neen.

Apak Jooi ɔl o iŋaaz daayiza

¹¹Kicina ni bodo lecer ci alaaŋetu vɔɔr appe ɔɔt. Ma kacin buk eet ci aavi lecere nico o. Ma azi tammu taden kibeen looc ɗim nɔɔɔn ŋuma, kɔkɔm eet ci acin bodo. ^{12–13}Ma kicin ɔl baal adaayitɔ e dook o titiny kibeen o celbez. Itiŋgazo ɔl baal gɔɔn adode liilowe e kibeen ɔl baal gɔɔn adayi looknyai e dook korogit. Ma avu eel niigi dook lecer ci alaaŋetu o ŋuma. Ɔkɔle ni warage o rogeto kibeen waragenya oogi. Ma apawonek nɔɔɔɔ dook kaala ugeec baal gɔɔn agɔɔn e. Ma kaala cigeece noko dook eteyeede da waragenyaye nicoko keelit ebaal da gɔɔn agɔɔni niigi e ele. ¹⁴Ɔkɔma zin bodo daayiz, ma ɔkɔma buk ŋin o miniŋu. Ujuktozek niigi dook goo o abil been neen. (Ma goo nici goo ween daayiz o aŋorneke neen.) ¹⁵Zin mɔ alaŋ ajoyai eet zaara cigine waragewe ci rogeto noko, ajukonek niini goo nico.

Acin Jɔn tammu taden kibeen looc ci colai

21 ¹Kicina ni tammu taden ci colai ki looc ci colai. Maje tammu taden o rɛen been looc o rɛen been liilok iziti ɗim. ²Ma kacin kutur o Joowo titiny kazi Jerusalem Colai. Akunak kuturi nici looc Joowa tammu tadena. Ma adimdiman Jooi kutur nico kiyo kabarzeci o ayiŋiŋan ele ka kitivice o. ³Ma kazii molok ci appe aku lecere o Joowo. Azi mɔloyi nici ne, “Inoko iya Jooi ka kiiya koromte ki ɔl o deer. Ka kabaayitɔ niini ki nɔɔɔɔ ŋaatodoi ka zin kiziti niigi ɔl cigin. Ma abaak Jooi niini alya ŋaatodoi ki nɔɔɔɔ kizi niini Jook cineeŋ. ⁴Ɔjaan zin eeya niini nɔɔɔɔ tilalo keberene ugeec. Ɔkɔma bodo daayiz, ki culum, been luwa ci aluwi ɔl. Ma ɔkɔma buk balcɔn, eeci idicai kaala baal rɛen e dook lai.”

⁵Izi ni Jooi o aavi lecere onin alaaŋetu ne, “Inoko kutuguwa kaal dook kizi colaye.” Ma anekan buk niini aneeta ne, “Teyɛet kaal nicoko, eeci zoowawa nicigi zoozok ceen didi, ma buk agano ŋaati atuwi ɔl.”

⁶Ma azi ne, “Inoko zin odota. Aneet neen o koontane, ma katiranane. Mɔ anyak eet ci aruk kɔr, ŋaan kanyi nɔɔɔn maam o ariiya valacece o anyak roget. Kanyi naana nɔɔɔn maam nicoko kɔkɔm gi ci ataali. ⁷Ma eeti ci amez piryakzet ajowa niini kaal o abon dook ŋaatan. Ma keen naana Jook onin, ma een niini ŋeran. ⁸Maje zin bar dalaanowa o gɔɔn amiiri ki vurut gole o Joowo, ki ɔl o alaŋ atuwe, ki ɔl o monyento, ki waanŋyak, ki tamaranya, ki ɔl o adiŋɗan joowanɛ o adilyai, ki voloŋnyok, ŋintineeŋ neen goo o alanyit een lɔtɔn. Nici zin daayiz o vurto aŋorneke neen.”

Acin Jɔn kutur o ɔl o Joowo colai

⁹Iiyayan ni toonnyaiti codoi toonnyaye baal een torgerem baal anyak kodoocɛ ween torgerem abiz piryakzet ki giden o aŋorneke lɔɔci e. Ma aku anekan ne, “Ija ka keyeleyin nyataran o Nyɔɔn o Joowo.” ¹⁰Iiyayan ni Vɔŋizi wunozyai, ma akoyan toonnyaiti biye ci wun tadena, ma akɔ ayelekan kutur o Joowo adiŋɗan kazi Jerusalem Colai. Akunak kuturi nici looc Joowa tammu tadena. ¹¹Ma alanyit kuturi nici dɔyize o Joowo kook zɛɛ ma azi pilpil kiyo kagorana o alina ɔɔt gɔɔn azi pilpil o. Ma buk liilim kiyo gizazac o. ¹²Ma aliya kutur nico kaluwa ci adikir wun kaal ci anyak araanok amɔtɔ ram. Ma anyak toonnyak ci tammo een amɔtɔ ram abek araanok nicoko. Ma ayeedonek araanok nicoko zaara o boryok o Israyil een amɔtɔ ram. ¹³Anyak kuturi nici araanok iyyu kabanyɔi dook. Libire ci akɔ ki jen o anyak araanok iyyu. Libire ci akɔ ki nyagi e anyak araanok iyyu. Libire ci akɔ ki tenet e anyak araanok iyyu. Libire ci akɔ ki baatikeri e anyak araanok iyyu. ¹⁴Ma eenyci kaluwa ci kutur nico o loota biyene ceen kitiirwa een amɔtɔ ram. Ma ayeedonek biyen nicoko zaara o toonnyak o Nyɔɔn o Joowo.

¹⁵Ma toonnyaiti ci azoozekan o anyak keet ceen warki ci ka kayabizi kutur ki araanok been kaluwa. ¹⁶Maje kaluwa ci kutur nico o wun kal, ma anyak libiro wec ci atobo dook tebezɛk, ma alɔɔɔ keŋ. Mazi akɔ ayabiz toonnyaiti nici kutur nico keete cin yabziinto noko, wun kutur nico keŋ kal kurum libir codoi milane ceen 1500. Ma buk wun taden kal kotobto ki milane nicoko nɔkɔ. ¹⁷Ayabiz buk bodo toonnyaiti kaluwa tiŋtiŋon aziita, ma atobo tiŋtiŋoni kibeen aziit lak eet torgerem ki tiin wec (144). ¹⁸Ma eenyci kaluwa nici biyene ci azi pilpil, maje kuturi dook eenyci warkine ci liilim ɔɔt kiyo gizazac o. ^{19–20}Buk kaluwa cine o dook loota eenyci biyene ceen amɔtɔ ram ci anyak golnya ci meelik azi pilpil. ²¹Ma eenyci araanowa cigine een amɔtɔ ram o biyene ci vɔɔrik per kiyo kii keŋ o. Maje gɔl ci kuturo o eenyci warkine ci liilim ɔɔt kiyo gizazac o.

²²Ɔjaan zin bodo kicin ŋinti taabinto kuture nico, eeci aavtiz Jooi been Nyɔɔn onin ŋinaante. ²³Ma ɔl ci abaak kuture nico o alaŋ arɔɔŋ ii, karabɔŋ een nyelok, eeci vooritin o Joowo ataran looc dook ŋinaante. Buk Nyɔɔn alanyit niini kuture nico kiyo tɔl o. ²⁴Awɔ zin tiŋeere ɔl o loocu dook vooritine nico. Ma anyaaŋ alaata o loocok dook kaalyan ugeec arozketu kutur nico. ²⁵Ma akole araanowa dook tup nɔkɔ, ma akɔm eet ci anyook nɔɔɔɔ been neen, eeci ɔkɔma muuritin ŋinaante. ²⁶Ma tiŋeere anyaaŋ arozkɛt dook ki diŋɗiŋon o moden dook ŋinite. ²⁷Ɔkɔma zin bodo kaal ci ger kuture nico. Ma buk ɔkɔma voloŋnyok, ki ɔl ci agɔɔn kaal ci ger ci ka kɔɔt kuture nico. Awɔ zin kuture nico ɔl o ayeedi zaara ugeec waragewe o rogeto anyak Nyɔɔn doon.

Liil o Rogeto

22 ¹Eyeleyan ni toonnyaiti liil o maam o rogeto. Maama cigine o liilime kiyo gizazac o. Aduŋna liili nici lecere o alaaŋet o Joowo been Nyɔɔn. ²Ma ariik liili nici kuture nice gɔl o adikir kɔrgena. Ma aduŋna keena ci rogeto baagitok dook. Ma abiir keena nici lak amɔtɔ ram irkite codoi. Maje bɔlowa cigine o arogoz ɔl moorizowe. ³Ɔkɔma zin bodo ŋinaante gi ci anyak toriin o Joowo kiyo baale e been neen. Eeci leceri o alaaŋet Joowo been Nyɔɔn aavi kuture nice. Buk ɔl o Joowo adiŋɗan tiŋeere niigi nɔɔɔn ŋinaante. ⁴Ma acin tiŋeere niigi ŋum o Joowo, ma ayeedonek tiŋeere zaara ogine nɔɔɔɔ ŋumti. ⁵Ɔkɔma zin bodo baalin kina

ɲinaante, ma akɔm eet ci arɔɔɲ tɔl karabɔɲ een kɔr ci araane, eeci izi Manyi Jooi vooritin cineeɲ. Iziti zin niigi tiɲeere alaat nɔko izi neen.

Azi Yesu ne, Kakun

⁶Ma anekan toonnyaiti ci Joowo noko ne, “Zoozowa nicigi zoozok ceen didi, ma buk agano ɲaati atuwi ɔl. Itoonanan zin Jooi ween Manyi aneet ka kiiya keyelizayuɲ igeet o anuyu nɔɔnɔ kaal o ka kiitazɔ katin.”

⁷Azi Yesu ne, “Iziyit zɔɔz ci kaduwakuɲ o juruɲ. Kakunakuɲ tiɲeere kataman. Amayuwi zin eeti ci agama zoozok o ayeedi waragewe nico.”

⁸Aneet Jɔn neen o kicina kaal nicoko dook, ma kiziiwa. Ma vurte o kicine kaal nicoko, ma kiziiye, kakate kozoɲti looc ɲume o toonnyai o tammo ayelekan kaal nicoko. ⁹Ma bar anekan niini ne, “Má adiɲɲinan aneet. Kalinɲiɲonei buk naana Jook kiyo niina been gotonogu ween nyakananet been ɔl o azooni zoozok o ayeedi waragewe nico dook o. Jook zin doon o abon adiɲɲinan.”

¹⁰Ma bodo anekan ne, “Má arɔɔde ɔl zoozok ci Joowo ayeedi waragewe nico o, eeci iiteni o ka kiitazai kaal nici izi ajɔn.

¹¹Anyek zin eet ci agoɔn kaal ci ger, kutugu labak. Anyek eet ci agoɔn kaal ci abon, kutugu.”

¹²Azi Yesu ne, “Iziikto di. Abon niiga atalninu, eeci kakun kataman ka kiiya kapayek ɔl kaal ugeec agano baal goɔn agoɔn niigi e. ¹³Aneet neen o koontane, ma katiranane. Keen ɔɔ kaale dook, ma kaɔorneke kaale dook.”

¹⁴Amayuwi zin ɔl o oony zinzeeti ugeec kitiliza. Nɔɔgo neen o agano ɲaati adayi kebere o keet o rogeto, ma agano ɲaati avɔyi niigi kuture nico eecito. ¹⁵Ma ɔl o abaak kuture nice alaɲ een ɔl ci ger been neen. Akɔm ɲaatineeɲ tamar, ki waɲ, ki monyenet, ma alaɲ adiɲɲinan niigi joowane o adilyai, ma akɔm vɔlɔɲ.

¹⁶Azi Yesu bodo ne, “Keen naana dole ci dɔl o Devid o keen Kiristo, ma keen coboc o ɲeeretinu vɔɔr ɔɔɔt. Kitoonekuɲ zin toonnyai onan igeet ɔl o tuwento dook ka kook kuduwayuɲ niini igeet zoozok o ayeedi waragewe nico dook.”

¹⁷Ma azi Vɔɲjizi o Joowo ki nyataran o Nyɔɔn o Joowo ne, “Ivita ka agamta zɔɔz nico.” Abon zin buk ɔl o azii zoozok nicoko azi ne, “Ivita.”

Ma ɔl o aruk kɔr dook, abon avu ka kivita kowodit niigi maam o rogeto nɔko calaɲ ataal.

Aduwa Jɔn zɔɔz o aɔorneke

¹⁸Karicanekuɲ zin naana Jɔn igeet dook o iziiktu zoozok ci ayelzaket Jooi ageet waragewe nico noko, mā azaac eeti zoozok nicoko zoozowe cigin doon, azaacek buk Jooi nɔɔnɔ pɲiyakzet o ayeedi waragewe nico. ¹⁹Mā aara eeti zoozok nicoko oogi bitaala, aara buk Jooi tiɲeere ɲaatin kebere o keet o rogeto, ma alaɲ anyek niini nɔɔnɔ kook kuture onin titiny ayeedi waragewe nico.

²⁰Ma Yesu o ayelzaket ageet kaal ween didi azi ne, “Didile, ɲaan kakun kataman.”

Nɔɔnɔ neen. Ija zin Manyi Yesu.

²¹Abon bai deteni o Manyi Yesu aavi ɲaatunooɲ igeet dook.